



黃文獻集
附錄
補遺

七





黃文獻集

附錄補遺

(七)

黃潛撰

黃文獻公集卷之十上

碑文

宛平王氏先塋碑

今上至正六年秋八月中順大夫江浙等處財賦都總管王公得請於朝。疏恩二代。爰狀其實。來諭於潛。曰。是宜有述。以章示上。賜庶假寵我子孫於無窮。敢屬筆於子。潛辭不獲。則序而銘之。按王氏。上世家遼之蓋州。總管公之高祖諱璘。知金將亡。與二兄禧。祺。擁衆歸于我太祖。從睿宗南攻汴。愍二兄之死。事。感激奮勵。誓不與敵俱生。摧堅擊強。所向輒克。屢以捷聞。汴既下。計功行賞。授虎符管領女直漢軍都元帥。奉二兄柩葬於燕之宛平。因爲其縣人。高祖母曰亦刺氏。曾祖諱德璋。襲父職。仍爲管領女直漢軍都元帥。曾祖母曰吾古倫氏。祖諱堦。通文史。尤善譯語。事憲宗爲必闕赤。而以材學受知世祖。擢禮部侍郎。於是國家龍興垂六十年。上方注意稽古禮文之事。所以潤色鴻業者。左右攸助。與有力焉。居歲餘。出爲真定路奧魯總管。真定於河北爲巨鎮。民多占籍軍伍。撫馭之甚有恩意。人皆德之。祖母曰李氏。幹里根氏。父諱承良。好修而嗜學。歷觀古昔廢興失得之故。而慨然有志於當世。鮮有能深知之者。嘗由行工部怯。恰口總管府令史。補徽政院掾史。調將仕郎冀州等處納綿提舉。遷從仕郎崇祥監知事。監陞爲院。以承

事郎爲其院都事。又以承務郎爲其院之規運提點。母曰李氏。魏氏。四世皆祔葬宛平先墓之次。此其系序官業之可見者也。初。總管公由晉王內史府掾陞記室。遂入掾中書。以文林郎任禮部主事。始贈其父。應奉翰林文字。文林郎同知制誥兼國史院編修官。及公以殊祥院都事。遷宣政院經歷。轉奉直大夫。參議院事。乃贈其父奉議大夫。樞密院判官。驍騎尉。太原縣子。其後公自大宗正府左右郎中。改授大都兵馬都指揮使。又贈其父中順大夫。兵部侍郎。上騎都尉。太原郡侯。至是公以中政院判官拜今命。遂追贈其祖翰林直學士。亞中大夫。輕車都尉。太原郡侯。李氏。幹里根氏。並太原郡夫人。加贈其父嘉議大夫。禮部尚書。上輕車都尉。太原郡侯。李氏。魏氏。並自宜人。累遷至太原郡夫人。公妻孫氏。亦以從封至太原郡夫人。蓋自尚書府君而上。四世咸有官序。而蘊蓄之素。未克大施。福祉所儲。總管公實承之。公名洪。字彥弘。少受學於鄉先生。同門莫不敬服。事幹里根夫人。定省之節。衣服飲食之供。靡所違缺。寒夜則捧其足而臥。病日則每旦以舌舐之。至病愈乃已。尚書府君既歿。家事悉咨於魏夫人。而後行。得祿必歸之。且舉孫夫人。匱具以奉焉。先世所遺田廬。則盡以畀其子慶。不幸慶蚤世。喪之過哀。人尤以爲難。有餘貲。輒分惠其三族。貧無所依。與不能具吉凶之禮者。則贍給之。所引拔登仕版者。二十餘人。其居家孝友如此。至於蒞官臨民。績用尤著。始入內史府來謁選。而六七年不得調者。三百餘人。亟爲關白。程其材器。較其資歷。而補署焉。天歷初。通州三河潞縣之人。爲東兵所殺掠。兵未息。而又苦寒。公時在宣政院。中書傳上旨。俾往賑之。賴以全活者甚衆。收瘞其死者四千五百餘人。誘還其俘虜者三千五百餘人。兵馬司主求盜。

事最叢劇。而能使庭無留訟。皆其灼然可紀者也。觀公名位之進。則積善之慶爲可知。觀公行治之修。則義方之教爲可見。是用牽聯而備書之。公有子二人。長曰惟德。國學生。次曰螟蛉。女三人。皆在室。其蕃衍盛大未艾。嗣是宜有屢書不一書者。銘曰。王氏之先。奮自遼東。際逢興運。克有伐功。來居於燕。蟬聯奕葉。踐敷中外。珪重組疊。志局于位。厥施未光。委社後人。五世而昌。煌煌密章。地恩父祖。升華禁從。疏封胙土。惟神在幽。被服褒嘉。假茲寵靈。大啓厥家。史臣作頌。庸侈上德。勒諸堅珉。昭示無極。

廟碑

故陝西諸道行御史臺御史中丞贈據誠宣惠功臣榮祿大夫陝西等處行中書省平章政事柱國

追封濱國公諡文忠張公祠堂碑

故濱國文忠張公家濟南。而其別墅在歷城縣北十里華不注鵲山之陽。歷山之陰。號曰雲莊。公自參議中書省事。退休其中者垂十年。至治泰定之間。詔使沓至。皆堅臥不起。文皇御極。以翰林侍讀學士召。未至。改陝西諸道行御史臺御史中丞。公乃幡然就道。時公年甫六十。到官。厪三閱月而薨于位。天歷二年七月壬午也。始公嘗謂吾居雲莊而樂。且密邇吾先世大墓。吾死必以昭穆序葬。而於是乎祠焉。九月丙辰。公嗣子今祕書郎引遵治命。奉柩以葬。而以清河郡夫人郭氏祔。至順二年三月戊子。乃作祠堂。凡屋之爲間者四。堂居其三。而室居其一。妥神有位。物器備完。歲時歲事。饋奠惟謹。以潛忝綴公門生之末。俾

有述以告來者。淫竊惟公初尹堂邑。撫人有恩。用獄不失有罪。能使豪強嚙伏。而盜賊化爲良民。爲御史則抗言尙書省不可立。其變更法度。易置官府。將勵天下。且擅除御史大夫中丞。非祖宗故事。疏時政之弊萬餘言。力拄權姦。幾蹈禍而不悔。在中書則諫止內廷燈山之戲。卒以忠直受上賞。暨執法西臺。屬關右荐饑。壹以荒政爲己任。有禱于神。其應如響。乃傾私囊。斥公帑。奏請大發錢粟。下輸米授爵之令。用便宜通鈔法。以來商旅。由是人始得食。至於疾病死亡。皆具爲區處。慮有司怠於奉行。則分遣察官臨視之。委曲纖悉。竭盡其力。賴以少甦者雖甚衆。而公竟以憂勞悲感。奄及於大故。捐館之日。奏元鼓樓梁木自壞。濟南里第有光若隕星者。民之無祿。庸非天乎。事聞。制贈公摠誠宣惠功臣榮祿大夫陝西等處行中書省平章政事柱國。追封濱國公。諡曰文忠。卹典之優異。先帝憫悼深矣。公所務學。致於實用。而一語一默之細。亦無所苟。仁宗時。公居禮部爲侍郎尙書。兩持文枋。克廣賢路。深契上衷。新進士銜刺來謁。輒拒不與爲禮。書方寸之紙。令關人諭之曰。但思報國。無以私謝爲也。所撰著施於朝廷。行於四方萬里。人莫不傳誦之。蓋公之蒞民。政多卓異。宜如循吏之立祠。直道以匡君。而勤事以死。宜如功臣之祭於大烝。文學論議。存乎淑艾之私。宜如先賢之祀於學。固非其家所得而專也。然以公居此爲最久。從容去就之際。聞者至今爲之咨嗟歎息。過而見其平生釣游處。池深水寒。猶將低徊不忍去。況登斯堂而仰公之遺風餘烈。可使貪夫廉。懦夫立。其於名教。殆非小補。尸而祝之。豈獨仁人孝子用以厚其親哉。潛遂不敢辭而序其槩。復爲銘以系焉。公諱養浩。字希孟。世次官闕行事之詳。有傳在史氏。今皇上又申勅詞臣。勸諸石

章昭揭墓隧矣。非有關於祠事者。此不著。銘曰。瞻彼樂郊。齊山兩間。山之幽幽。水清且漣。孰遑公歸。而止于此。使者在門。公不爲起。止非無所。行也以時。大君有命。賁然來思。曰予赤子。汝饑予哺。庶幾當宁。寬是西顧。盡瘁以仕。不有其躬。神游故墟。有寧一宮。公像在斯。皇皇卷服。生氣凜焉。過者必肅。

故參知政事行中書省事國信使贈榮祿大夫平章政事上柱國追封閩國公諡忠愍王公祠堂碑。至元十五年秋七月。閩國王公。以福建道宣撫使覲于上京。世祖皇帝與語大悅。朝退。首命左丞張公。卽公寓邸傳旨。詢日本事。公對以日本蕞爾島夷。不足煩天討。因畫招徠之策以進。深契上衷。將使預聞國政。公懇辭。迺降金虎符。授公中奉大夫刑部尙書福建道宣慰使兼提刑按察使。仍爲御便殿曲宴。以遣之。俾左丞呂公爲公起舞。霑醉而止。公旣還。治閩中。具宣德意。十六年夏五月。舉家入朝。明年正旦。上眷禮有加。擢兵部尙書。數奏事稱旨。嘗命之坐。而輟御膳以賜。以廷辯薄百官俸非便。忤權臣意。丐外。十九年春二月。拜正奉大夫參知政事行中書省事。將之官江西。卽政事堂條陳二十四事。丞相齊魯國文忠公大喜。恨得公晚。留公毋行。二十一年春正月。進對。言日本未易以力服。而可以計取。誠令臣等備一介之使。以招徠之。事成可無殘民匱財。卽事不成。亦無損國威重。上嘉納之。因以公爲國信使。凡所須一惟公意。公以爲臣他無所須。祇須一印佩之。擇參佐數輩。奉詔以行足矣。有旨命公視草。且賜公玉環連條。納瑟瑟袍帽。鞞馬鞍各一。俾丞相善護視公妻子之留質京師者。公旣陞辭。以夏四月發慶元。五月抵耽羅。耽羅人或勸公勿輕往。公不聽。秋七月。至日本境上。先令持旗榜諭其國中。并移書國王及用事者。日

本遣使郊迎甚謹。請遂以詔書入。辛卯望。熾舟對馬島。丙夜。俄有舉火。譟譟島上者。公竟遇害而薨。得年五十有六。夫人葉氏。攜諸孤。跣哭赴愬闕下。上聞訃震悼。命頒其家衣廩如故。給夫人驛券。乘官舸。五南還。究其事。尋謚公敬愍侯。錄其季子從仕郎南劍路順昌縣尹都中。爲少中大夫。平江路總管府治中。卽平江賜宅一區。田八千畝。厥後都中累遷荆湖北道宣慰副使。言公雖已得謚。而爵秩未稱。有司以聞。仁宗皇帝覽其奏。皇慶元年春三月。詔加贈公榮祿大夫平章政事上柱國。追封閩國公。改謚忠愍。於是夫人亦從公爵。封閩國太夫人。旣以告其第。太夫人母子相與感泣。懼無以昭上恩。侈前烈。爰卜吳縣至德鄉白蓮橋之西二百步。構堂肖公像而祠焉。公姓王氏。諱積翁。字良存。其先光之固始人。世爲宋世族。高祖諱戩。贈太保。高祖妣陳氏。東萊郡夫人。太保南渡時。嘗仕閩。因家焉。故又爲福之長溪人。曾祖諱椿。贈太傅。曾祖妣陳氏。通義郡夫人。林氏。平原郡夫人。祖諱萬全。登淳熙二年進士第。任處州青田縣令。贈太師。祖妣林氏。贈衛國夫人。考諱方大。贈少保。妣陳氏。潁川郡夫人。初少保無子。禱於顯應崔府君之神而生公。性至孝。博學工爲文辭。年十八。領國子舉。明年。用叔父參知政事忠文公伯大蔭。補承務郎。調監嚴州都酒務。故宰相吳公潛。分闔四明。辟奉國軍節度推官。改沿海制置大使司幹辦公事。累數十年不決之訟。悉以委之。凡所剖析三百餘事。有平心錄四卷。除提領戶部犒賞所檢察官。貽書漕使趙公與。嘗捐和平十二酒庫積逋十七萬。和平三百家爲之少蘇。馬公光祖以執政尹天府。辟浙西安撫司幹辦公事。奉朝旨決六縣獄。單車夜至餘杭。閱獄囚一百七十。悉得其情。當坐者僅數人。餘皆平民。明日。召縣官盡

釋之。所平反他邑疑獄，全活甚衆。辟淮東總領，所措置糴買官。江東轉運司幹辦公事，用舉者改秩。差知富陽縣，治辦爲諸邑最。皇族有縱家僮殺人者，論如法，無少貸。人尤快之。秩滿，堂除兩浙轉運司主管文字，力請寬版曹催科之限。東南諸郡咸便之。除監左藏封樁上庫，差通判臨安府。除提轄文思院，主管諸軍審計院，遷太府寺丞。兵部郎官，出知徽州，兼都督兵馬府參議官。軍帥李銓據城謀爲變，勢張甚。公以計柔服之。且施恩信，離其黨。民恃以無恐。加兵部侍郎，仍舊任。俄除江南東路提舉常平茶鹽。改福建路提點刑獄。行次永嘉，復以爲天下兵馬都元帥，益王府司馬，辭不就。改知南劍州，兼福建路提點刑獄。兼招捕使，進兵部尚書。除寶章閣學士，福建路制置使，兼職仍舊。於是德祐內附，三官已北上，而景炎新造未久，又航海去。迺抵福州行省，以八郡圖籍上之。行省承制，以公知建寧府，尋充福建道宣撫副使。部將李雄挾淮兵爲亂，殺同知宣撫司事潛說友，而屠其家。公收潛尸，爲治後事。且以計給雄，而厚結其麾下。因大閱擒雄，誅之。以功陞宣撫使，福州路總管，兼府尹，兼提刑按察使。已而淮兵亂復作，公率郡民捕其黨，悉斬以殉。閩生齒數十百萬，卒賴以完。亡何而入覲，鄉國之人至今思之。公夫人曰陳氏，曰林氏，皆封安人。先卒。曰葉氏，今閩國太夫人也。其爲比邱尼而在者，曰圓明，靜慧，慈照大師。住持杭州明慧寺。擲思母已卒者，曰宏宗，圓明，佛日大師。住持平江妙湛寺。普貴子男七人。曰時中，易名爲僧。已卒。餘悉以公奏補官。曰琦，明威將軍，同知肇慶路總管府事。曰權中，從仕郎，同知循州事。曰昇中，從仕郎，寧海縣尹。皆卒。曰建中，從仕郎，建安縣尹。閩國太夫人出也。從太夫人留質而歸。卒於維揚驛。無子。以都中之子爲其後。

曰衍端中。從仕郎。尤溪縣尹。亦卒。曰都中。今正義大夫。兩浙都轉運鹽使。女六人。四適名門。二爲尼。孫男七人。女四人。曾孫男五人。女一人。堂成後三年。都中以太夫人之命來徵文。將刊之。茲碑潛竊惟公之忘身殉國。亦旣簡在帝心。而足以暴白於天下。太夫人勤懇壹意。爲天所祐。年幾八袞。貌端神澤。福祉未艾。正義又以材猷德望。嚮用於時。有光於前人。蓋人紀之大者。三公之爲臣太（原版闕二百三十一字）而海深。非末學小臣所能窺測。懼無以稱塞明詔。願以待罪太史。屬職在記述。不敢伏闕控辭。則退而考其世次。官伐行事之實序。而銘之。昧死以上。謹按。王諱拜住。系出扎剌爾氏。六世祖諱孔溫窟哇。從太祖皇帝伐奈蠻。以己馬濟太祖。步戰而歿。贈推忠効節保大佐運功臣。太師開府儀同三司。上柱國。追封魯國王。諡忠宣。六世祖妣諱闔夔。追封魯國王夫人。五世祖諱木華黎。從太祖皇帝滅克烈。太祖卽帝位。以爲左萬戶。從破金入燕。專征遼東西諸郡。授太師國王。都行省承制行事。建牙于燕。以經略中原。金主南奔。齊魯趙魏晉秦之地。次第悉平。臨終以金人未滅爲憾。贈體仁開國輔世佐命功臣。太師開府儀同三司。上柱國。追封魯國王。諡忠武。五世祖妣諱晉合倫。追封魯國王夫人。高祖諱李魯。嗣國王。奉太祖皇帝命。攻西夏。定河北。平山東。以功食東平郡。贈純誠開濟保德輔運功臣。太師開府儀同三司。上柱國。追封魯國王。諡忠定。高祖妣諱合篤輝。追封魯國王夫人。曾祖諱霸都魯。從世祖皇帝伐宋。爲先鋒元帥。已渡江。與世祖會鄂州。而憲宗崩。世祖俾總師留屯而還。歿於軍。贈推誠宣力翊運功臣。太師開府儀同三司。追封東平王。諡武靖。曾祖妣弘吉烈氏。諱鐵木倫。昭睿順聖皇后女兒。追封東平王夫人。祖諱安童。事世

祖皇帝掌環衛之政。令位百僚。上拜中書右丞相。食四千戶。佐皇子北平王出鎮北邊。十年而歸。復拜中書右丞相。贊上册。皇后皇太子。議規襄陽以取宋。所薦史忠武公天澤。姚文獻公樞。許文正公衡。商文定公挺。皆時之宿望。以阿合馬桑葛尙書之政。誤國害民。而力斥之。立御史臺以正朝綱。立太常寺以崇典禮。定強竊盜賊論罪輕重法。以止濫殺。語國朝之賢相。必以爲稱首。贈推忠同德翊運功臣太師開府儀同三司。追封東平王。諡忠憲。加贈推忠守正同德翊運功臣上柱國。進封魯王。餘如故。祖妣怯烈氏。諱普顏忽都。累封魯王夫人。考諱兀都台。成宗時。襲掌環衛。以大司徒領太常寺事。贈輸誠保德翊衛功臣開府儀同三司太師上柱國。追封東平王。諡忠簡。加贈宣力迪慶保德翊運功臣。進封堯王。餘如故。妣篤思刺氏。諱吐薛怯溫。累封堯王夫人。忠宣忠武兩王。故有廟于東平。英宗皇帝特賜以碑額曰元勳世德。別贈忠憲王開國元勳命世大臣之碑。勅翰林侍講學士元明善製爲銘辭。樹于王所食采地范陽之通達。因臨幸而觀焉。號其地曰駐蹕莊云。王生五歲而孤。堯王夫人撫育備至。令知文學者。陳聖賢孝弟忠信之說以開導之。聞輒領解。大德十一年。武宗皇帝入正大統。王甫十歲。迎謁道左。上親執其手。慰籍久之。人見王巍然公輔之器。相與屬目。謂有祖風。至大二年。襲掌環衛。歷事仁宗皇帝。眷注尤深。延祐二年。擢資政大夫太常禮儀院使。四年。加榮祿大夫司徒。仍領太常。五年。遷金紫光祿大夫。六年。進開府儀同三司。七年春三月。英宗皇帝嗣位。拜中書平章政事。初。上在儲闈。王之令譽。日聞於左右。遣使召見。王謝曰。以扈從之臣。而往來宮邸。嫌疑之際。不可不謹。臣之獲罪。固無所避。亦豈太子福邪。上嘉其有識。可屬大

事。由是首登用焉。故事。天子卽位之日。必大會諸侯王。讀太祖寶訓。是日。命王啟而讀之。王風儀峻整。音節鴻亮。聽者肅然。夏五月。加上柱國錄軍國重事。進拜中書左丞相。先是東朝嬖倖。怙寵干政。首相帖木迭而頗與之相爲表裏。仁宗不悅。解其政柄。無何上崩。英宗在諒闇中。遂復出居相位。睚眦之怨。必報。一時善類。遭其誣讒。多陷于不測之罪。其黨與以權勢相刺。而日生罅隙。亦莫能自全。王與之並相。獨堅持正論。不少回撓。遇僚佐闕。必公選掄而用之。臺臣奏疏。謂君子小人不可同處。首相以爲譏己。而深銜之。顧未有以發。至治元年。監察御史言太歲在酉。不宜造寺於西山。遂指以爲謗訕。言者旣橫加酷罰。因盡斥舊臣。而援鐵實爲御史大夫。又以其子八里吉思爲宣政中政等九使。瑄南爲治書侍御史。姻黨分據要途。秋某月。王至自上京。視事于中書。首相稱疾不出。以伺間而謀爲中傷。已而言疾愈將出。上使出之。氣乃沮。二年秋。遂以病死。八里吉思與姦人妄獻民田。而冒受其直。王奏誅之。又奏黜瑄南。以通言路。冬十一月。王拜中書右丞相。監修國史。上爲虛左揆之席。以示圖任之專。仍降詔布告于中外。王舉前平章政事張珪。與之共政。集大臣及故老。詢所以弭日食地震之變。士大夫遭擯棄者。咸以所長收敘。文學之臣。則待以不次之除格。內降待銓者六七百人。振舉學校。而士知所作興。修明條制。而吏有所遵守。減江南民租八十餘萬石。設宗仁衛。贖蒙古子女之奴於民間者以隸焉。朝廷政令。聳然一新。四方之人。無不動色胥慶。上之始臨御也。以察罕腦兒行宮亭麗殿。規制褊迫。命改作而侈大之。王引節用愛人使民以時之言。極諫而止。又將以元夕結綵爲山。張燈禁中。參議中書省事張養浩上疏諫。王亟以聞。卽命罷之。

仍賜美錦以旌其直。仁宗當升祔而廟無其室。王傳旨集諸儒議。僉以爲廟之始建前殿而後寢。今寢已燬于災。宜更作前殿。爲間十有五。其中三間爲太祖室。以備祫享。列聖神御間爲一室。東西兩間爲祧。而以前殿爲後寢。上可其奏。廟制乃完。上欲躬行享祀之禮。王進太常所纂儀注。詔頒下有司。卜日有事於太廟。始備大駕鹵簿。建太常十有二旂。列黃麾仗五千人。上服通天冠。絳紗袍。出自崇天門。衆庶聚觀。儀衛文物之盛。莫不感歎。以爲三代禮樂復見於今。及行事。王攝太尉。上親被袞冕。執圭瓊。裸獻禮成。還宮。王率羣臣稱賀於大明殿。推恩錫賚有差。上嘗坐穆清閣。顧謂王曰。今亦有如唐魏徵之敢諫者乎。王對曰。槃圓則水圓。孟方則水方。有太宗納諫之君。則有魏徵敢諫之臣。上稱善。或勸上純任釋氏之法。以治天下。上問王何如。王曰。釋氏之道。貴清靜寂滅。可以自治。而不可以治人。帝王之仁義禮樂。乃所以爲治也。上默然。有旨俾王提調大司農。王曰。宰相之職。無所不統。寧獨大司農耶。上以爲知大體。嘗賜以金春殿車。又嘗閱寶玉於章佩監。命惟意所擇。皆力辭。尋詔姻宗室女。又辭。命國工繪王像。勅翰林侍講學士袁桷爲之贊。御書唐皮日休吾愛房與杜。魁然真宰輔。黃閣三十年。清風億萬古。之詩以賜之。蓋期望之也。至矣。王亦感上殊遇。自任以天下之重。事有當弛張。知無不爲。旣盡發故首相欺悖之迹。削其官爵。仆其碑。籍其家。背公死黨者。多謀不利於王。左右請爲之備。王曰。吾盡吾心上。不負吾君。吾祖父。下不負吾士民而已。何備爲。然深患讒言之興。因侍燕間。從容奏曰。陛下不以臣年少無似。使備員宰相。方務彰善。瘴惡。期致隆平。苟有沮之者。則臣不能有所爲矣。上曰。卿第勉之。果有間言。朕不聽也。三年夏。上時巡。甫

至上京。夜寐不寧。趣大作佛事。王曰。財從民出。國以民安。殫財困民。未見其福。上矍然曰。朕所創。惟壽安山。餘皆完其舊爾。民亦以爲病乎。自今其輟土木之役。旣而負罪懼誅者。復陰謀羣僧。言國當有厄。非作佛事而大赦。無以禳之。王叱曰。爾輩不過圖得金帛而已。又欲庇有罪耶。姦黨聞之。皆失色。而八里吉思之罔上爲姦利。事連鐵實。恐不自保。遂與赤因帖木而等。潛畜異謀。其年秋。乘輿還次南坡。帝崩。王亦及於難。王生於大德二年春三月八日。薨於至治三年秋八月四日。享年二十有六。以是年某月某日。葬於大都宛平縣某鄉田村之原。秋九月。晉王入繼。逆臣族誅。命奉王像祠於海雲寺。泰定元年。贈清忠一德。佐運功臣。太師。開府儀同三司。上柱國。追封東平王。諡忠獻。今上皇帝。至元元年。又勅翰林直學士歐陽元贊。王像藏於祕書監。某年。加贈孚道志仁清忠一德功臣。進封鄆王。改諡文忠。太師。開府儀同三司。上柱國。餘如故。祖考皆加贈進封焉。夫人諱妥安。徽太府卿士祿不花之女。婦道母儀。協於閭範。王薨。省臺各奏。賜鈔十五萬緡。今上又賜金五十兩。鈔五萬緡。歲給諸王供膳衣物。仍勅奎章閣學士夔夔。大書表其所居曰貞節之門。夫人生於大德四年夏五月二十日。薨於至正三年夏六月八日。享年四十有四。以是年某月某日。合葬於王墓。由東平王夫人。進封鄆王夫人。賜諡貞靜。蓋異數也。子男二人。長答利麻。碩理。虎符宗仁。蒙古衛親軍都指揮使。後王口年卒。次因牙納。碩理。文宗時。賜名篤麟。鐵穆爾。襲職環衛。虎符宗仁。蒙古衛親軍都指揮使。時十有一。上見其朝服。列於班行。神采煥發。甚愛重之。命受經於奎章閣。歷崇福司太常。太禧兩院使。大宗正府也。可扎魯忽赤。宣徽使。知樞密院事。中間惟兩翰林院。皆再入爲

學士承旨。今以特旨遷大司農。仍舊階開府儀同三司。端粹博碩。尚文而下士。當承平無事時。侍上起居。弗懈益虔。人以爲能世其家。臣潛歷觀帝之肇基立極。必有元才鉅德。應期而出。以翊扶昌運。十亂造周。三傑與漢。載籍所記。垂輝千齡。然閱散之後。相業無傳。蕭張之家。侯封莫續。有如王之恢張先烈。乘時奮庸。爲國世臣。同休共戚。委社于後。繼述有人。可謂卓冠古今。夔絕倫比也已。矧惟昔之名臣。或前規後隨。以相成。或應變守文而共濟。未有不同心勦力。而能光輔帝室者。王以勳賢貴胄。夙受主知。魚水之親。昭合無間。而所與共立者非其人。王獨精白一心。盡瘁事國。力摧百壬之鋒。訖使朝廷百官。四方遠近。莫敢不一於正。蓋其事視古人爲尤難。雖遭值變故。而平生大節。彌久益著。又亘古之所未有。播之聲詩。以震于無垠。夫亦勸忠之道也。百世之下。尙鑒于茲。銘曰。

大明麗天。赫赫英皇。巖石爾瞻。侃侃鄆王。惟王之先。鷹揚朔土。手挈中原。歸奉眞主。異才間出。騰風躍雲。克濟其美。爲國虎臣。聖神撫運。統一寰宇。轉旋鈞軸。篤生碩輔。垂紳正笏。乾清坤寧。經綸之業。惟王敬承。左右三朝。服勤帷幄。靖共正直。執事有恪。乃世其官。典領太常。乃授以政。乃登廟廊。崇儉抑奢。諫行言聽。乃宅百揆。以佐出令。仁漸義摩。文恬武嬉。禮樂之興。適惟其時。龍旂承祀。肅肅在廟。惟時顯相。丕揚聖孝。德教所加。望治有期。孰使其兜。接武夷變。緬彼滔天。屹乎砥柱。不震不竦。衆正所怙。福善禍淫。天道之常。魁柄旣專。化弦乃張。噫。靈滌盪。天青日白。橋机嵬瑣。莫掩其迹。蹈于危疑。構茲閔凶。萬姓之悲。攀髯抱弓。金枝翠蓋。神游寥廓。英姿爽氣。清風延閣。增崇位號。惟帝念功。勒辭圖堅。于以勸忠。尙其嗣人。咸有一德。

與國同休。永永無極。

勅賜康里氏先塋碑

康里氏三葉。疏王封者六人。踐相位者四人。咸有石章。以紀勳德。而其塋域在京城和義門之外者。顧未有以表于封樹。至正八年冬十一月十有二日。皇帝御明仁殿。中書宰臣用今大司農達世貼睦邇之請。以聞。詔臣某爲之銘。以達世貼睦邇素善書。有旨就令書丹。別勅平章政事議中書省事姚庸篆其額。以賜焉。臣潛忝以非才。待罪太史氏。職在論撰。不敢控辭。康里古高車國也。我太祖皇帝親征而略其地。其國之近屬有二孤子。曰曲律。曰牙牙。其母古麻里氏。賢而有識。以二子寘穉中。負以囊馳而來朝。則太祖已賓天。乃以二子獻於太宗。曰。此吾國之遺亂也。不可爲人所得。而辱於奴隸。敢以來歸。幸他日爲天子使。上憐而撫育之。暨憲宗御極。二子旣長。召入宿衛。領昔寶赤。遂扈從伐宋。母回康里而復來。值憲宗陟方。諸將皆北還。二子獨後。禱於神祠。若有稱好者。再問而知爲吉兆。比至家。則二子亦至矣。世祖皇帝入正大統。疇其勞績。給以土田人戶。俾居興和天城之大羅鎮。母後以牙牙子貴。追封雲中郡夫人。牙牙贈宣忠翊德開治功臣開府儀同三司上柱國。追封雲中王。諡口口。配忽都台氏。封邢國夫人。繼桓答氏。封康國太夫人。丞相順寧忠烈王阿沙不花。丞相和寧忠獻王亦納脫脫。皆雲中口口王之子。丞相冀寧文忠王鐵木兒達識。則和寧忠獻王之子也。順寧忠烈王年十四。入侍世祖。以占對詳明。特見親幸。令門者

使掌門衛以察非常。久之，以西手千戶領昔寶赤，從成宗北征，與海都戰，數有功，入爲大宗正府，也可札魯忽赤。浙西豪民朱清、張瑄，以海運取顯官，有罪抵死，王奉旨簿錄其家，一無所私，詔賜王宅一區，鈔萬五千緡，命兼兩兵馬指揮，司達魯花赤，姦軌不作，輦下肅清。武宗卽皇帝位，拜中書平章政事，軍國大事，並聽裁決。尋加特進太尉，依前平章政事。有盜內府金者，王退朝，適與之遇，訝其倉惶失措，詰之，果得黃金五十兩，白金百兩，上命以金賜王，而誅盜。王辭曰：盜誠當誅，金非臣所宜得，請入金贖盜罪，上爲貸其死。有旨出內府鈔十五萬緡，賞蹴踘者。王力持不可，訖弗予。一日入侍於五花殿，覩上玉色，而進薄滋味，寡嗜欲之戒，上嘉其忠忱，命進酒。王曰：陛下旣納臣言，不足取信也，上爲罷酒。進中書右丞相行御史大夫，尋復爲平章政事，加錄軍國重事，兼廣武康里衛親軍都指揮使，封康國公，遷知樞密院事，薨。享年四十有七。贈純誠一德正憲保大功臣太師開府儀同三司上柱國中書右丞相，追封順寧王，諡忠烈。配達海的斤氏，追封順寧王夫人。索羅真氏，別哥倫氏，並封順寧王太夫人。和寧忠獻王，少從其兄幹禿蠻，獵於燕南，幹禿蠻使獻所獲，世祖皇帝見其骨氣沈雄，步履莊重，卽命入宿衛，暫武宗撫軍朔方。王在行間，與諸將大敗海都軍于杭海，手斷一士之首，連背胛以獻。武宗壯之，兵之始交也。武宗銳欲策馬出戰，王執轡力諫，上怒，揮鞭扶其手不退，上不得已而止。後與大將朵兒答哈語及之，朵兒答哈曰：太子在軍中，如身有首，如衣有領，脫有不虞，衆安所附，脫脫之進諫，可謂忠矣。上深然之。成宗大漸，丞相哈喇孫答剌罕稱疾臥直廬中，王口以使事至京師，乃俛馳告武宗，以國恤，且勸進。安口王乘間入朝，窺伺神器，旣

而仁宗奉太母至自懷口。忠烈諜知姦黨謀僞賀千秋節而舉事。亟白於仁宗。先二日而發。內難悉平。武宗聞太母詢所宜立於陰陽家。遣王還察事機。時太母以武宗遲迴不至。已命忠烈往道宗室諸王貴戚元勳推戴之誠。忠烈至野馬川。上見之甚喜。行次旺古察。而王繼至。趣使疾驅。與之共載。聞王致太母及仁宗之語。乃大感悟。釋然無疑。暨忠烈還報仁宗。即日命駕奉迎於上都。武宗皇帝正位宸極。尊太母爲皇太后。立仁宗爲皇太子。三宮協和。而無間言。王兄弟之力也。先是武宗嘗命王同知樞密院。問曾視事否。王對曰。今正殿未御。宗親未見。德音未下。而扈從之臣。撓取名位。失四方之觀瞻。寧不上累聖德。是以未敢祇事。上嘉歎不已。知樞密院只兒哈忽。侍上於潛邸。嘗有不遜語。將寘于法。王諫曰。陛下新卽位。大信未立。而輒行誅戮。知者以爲彼自有罪。不知者以爲報仇。恐人人自危。况只兒哈忽習於先朝典故。今固不可少也。上乃宥之。上京大宴。故事命一近臣敷宣王度。以爲告戒。王薦只兒哈忽。令具其言以進。果稱旨。上歎曰。博爾虎博爾忽。前朝人傑。脫脫乃今世人傑也。卽以所進之言授王。及諸王大臣被宴服。就列。王卽席。陳西北諸藩始離終合之由。去逆効順之義。聽者莫不傾服。王自同知樞密院中書平章政事。拜御史大夫。遷南臺御史大夫。召拜錄軍國重事中書左丞相。知無不言。言無不行。人以賢相稱之。尙書省立。以王爲右丞相。王辭曰。爵賞者帝王所以用人也。今爵及比德。賞及罔功。緩急之際。何所賴乎。中書所掌錢糧工役選法刑獄十二事。若從臣言。恪遵舊制。則臣願與諸賢黽勉從事。不然。用臣何補。上乃爲下令。俾濫受宣勅者。赴所屬繳納。僥倖之路旣塞。奔競之風頓衰。中臺有臧罰鈔五百萬緡。王請出以賑

孤寡老疾諸窮而無告者。莫不舉手加額。宗王南忽里部人。告其主爲不軌。王辨其誣。抵告者罪。宗王牙忽禿。徵其舊民於齊王。入不少部中。鄰境諸王。欲奉齊王攻牙忽禿。齊王懼。奔牙忽禿以避之。遂告齊王反。王簿問得實。釋齊王而徙諸王于嶺南。邊將脫火赤。請以新軍萬人益宗王丑漢。廷議俾王往給其資裝。王言時方寧謐。不宜挑變生事。辭不行。遂遣丞相禿忽魯。平章政事也先帖木兒。往給之。幾以激變。尋復爲中書左丞相。仁宗眷之彌篤。欲使均逸於外。拜江浙行中書省左丞相。下車伊始。進父老問以利病。咸謂杭城故有便河。達於江滸。湮廢已久。若疏鑿以通舟楫。物價必平。僚佐或難之。王曰。吾陛辭之日。密旨許以便宜行事。民以爲便行之可也。俄有旨禁勿興土功。王曰。敬天莫先勸民。民蒙其利。則災沴自弭。土功何尤。不一月而訖。工人至今便之。王以疑似召赴闕。杭民數萬。號慟遮道不得前。既至。賴仁宗察其無他。厚賜而遣之。還鎮。王至杭未幾。遷江西行中書省左丞相。英宗嗣位。召拜御史大夫。帖赤陰忌之。奏改南臺御史大夫。復嗾言者劾其擅離職守。將徙之雲南。會帖赤伏誅。乃解。王家居不出者五年。泰定四年二月二日薨。享年五十有六。王階至開府儀同三司。勳至上柱國。爵爲馮國公。兼官爲集賢使。仁虞使中都留守。司達魯花赤開寧路。達魯花赤。領崇司。回回司。天臺中。衛廣武。衛親軍都指揮使。贈推誠全德守義佐運功臣。太師中書左丞相。階勳皆如故。追封和寧王。諡忠獻。配也先氏。封馮國夫人。武宗又妻以畏兀氏月魯忽圖。仁獻章聖皇后之同乳也。封薊國太夫人。冀寧文忠王。以大臣子。事明宗於潛邸。宏才雅量。好學下士。夙負公輔之望。歷事累朝。由同知都護府事。爲工刑兩部侍郎。擢監察御史。遷祕書郎。除

禮部尙書。遂參議中書省事。擢西臺侍御史。未行。留爲奎章閣侍書學士。除大都留守。遷同知樞密院事。上旣總覽權綱。用脫脫爲中書右丞相。王爲右丞。以便新庶政。科舉之廢也。王在參議府。爭之不得。訖不署其奏牘。至是力爲上言。前代科舉得人之盛。遂復行焉。金山大雪。上遣王及知樞密院衆家奴齎鈔一千萬緡。衣表裏各二萬疋。往周給之。王被命卽行。雖跋涉無所憚。拜中書平章政事。每入直。上爲御宣文閣。詢以治道。往往至夜分乃退。上親祀南郊。王言熙事慶成。宜均惠于下。詔賜民明年田租之半。嶺北地寒不宜稼。歲饑。賑以鈔無從糴。王請轉京倉米百萬石貯和寧。由是備先具而民不告病。兩浙閩廣鹽額累增而課愈虧。王請歲減十萬引。以紓亭戶之力。中政近臣。謀發番舶規取息。王言與商賈爭利。恐遠夷得以窺中國。事遂已。日本海商百餘人。遇風漂入高麗。表請沒入其人於有司。以爲奴。王以爲天子一視同仁。四方皆吾赤子。豈可乘人之險以爲利。宜資其還。上從之。日本果上表稱謝。無何。日本有僧告其國遣人至京師。刺探國事。王曰。刺探者在敵國固有之。今六合一家。何以刺探爲。果有其人。正可令睹中國之盛。歸告國人。使知嚮慕。旁觀稱歎曰。眞天朝宰相之言也。拜御史大夫。務以靜重持大體。不爲苛嬖以立聲威。建言近歲大臣獲罪。重者族滅。輕者猶籍其妻孥。祖宗聖訓。父子罪不相及。請除其法。上從之。遂著爲令。飢民集於輦下。奏出贖罰鈔糴米萬石。卽近郊寺觀爲糜以哺之。所活不可數計。居歲餘。復爲平章政事。進位次於端揆。大駕時巡。留鎮大都。舊法細民糴於官倉。出印券月給之者。其直斗三百文。謂之紅貼米。賦籌而給之。盡三月止者。其直斗五百文。謂之散籌米。豪民貪夫得買其籌貼以爲利。王請別發

米二千萬石。遣官坐市肆，使人持五十文，卽得米一升。姦弊遂絕。民蒙其惠，乞解政柄，不允。拜錄軍國重事中書左丞相，領經筵事。王入則告上以帝王之道，出則正紀綱，修法度。奏立內外通調之制，朝臣外補，許得陛辭。上親臨遣，書以成效。郡邑賢能吏，亦次第甄拔。分海漕米四十萬石，置沿河諸倉，以備凶荒。先是朝廷患僧徒擁厚貲，事兼并，抑使與齊民均受役於官。柄國者右之，法遂中變。王奏復其舊，延登故老，俾預大議。旁求遺逸，待以不次之擢。加孔子後嗣襲者秩二品。歲一再詣國庠，進諸生而獎勵之。使士咸知勸。王天性忠直，學術正大，剴裁庶務，片言立決。重輕予奪，各適其宜。上嘗問爲治何先，王對曰：莫先於法。祖宗上因稱王文統爲奇才，而有不同時之歎。王前奏曰：世祖行仁義，而文統輔以功利，此所以爲世祖之罪人也。使文統復生於今，猶當遠之。何足關聖念乎。蓋王於書無不讀，尤喜聞儒先性理之說，而明於義利之辨，相業之隆，實基於此。從幸上京，還入政事堂。甫一日，暴得危疾。上命近臣挾名醫狎至，疾已不可爲。以至正七年九月十八日薨，年四十有六。葬以其月二十六日。上命有司護其葬，仍給賻鈔二十五萬緡。兩宮皇后及太子致賻有差。王階至開府儀同三司，勳至上柱國，兼官爲昔寶赤右手萬戶。左阿速親軍宣忠幹羅思親軍都指揮使司達魯花赤提調留守司武衛太醫院廣惠司寧徽寺事。贈開誠濟美同德翊衛功臣太師中書右丞相。階勳皆如故。追封冀寧王，諡文忠。配曲出氏。追封冀寧王夫人。執政大臣言相位不可久虛。上曰：鐵木兒達識有兼人之才，後難爲繼。朕當徐思之。金山札尼別使者入見，上顧謂知樞密院阿吉刺曰：鐵木兒達識籌邊事皆與朕意合。斯人豈可復得哉。因俛首太息不已。按康里

氏世譜。雲中王之配邢國夫人。生四子。曰孛別舍兒。曰和者吉。贈推忠宣力保德佐運秉義功臣。太保開府儀同三司上柱國。追封榮王。諡忠武。曰不別。遙授甘肅行省右丞。曰斡禿蠻。繼康闕太夫人。生二子。一女。二子則忠烈忠獻兩王也。忠烈子男二。長海亦兒。順寧府達魯花赤。次伯嘉訥。前尹京時。平反海商被誣爲盜者。所活一百十六人。累遷中政院使。女一也。里八思密失。適上都兵馬都指揮使亦思馬因。封雲中郡君。孫男一。託和直。女二。忠獻子男九。長霸都。仁虞都總管府達魯花赤。贈禮部尙書。次卽囊寧文忠王。次玉樞虎兒吐華。同知樞密院事。次達世貼睦邇。嘗以平章政事行省江浙。首行視忠獻所浚杭城。便河而除治之。父老多忠獻之遺民。無不感泣。入爲大司農。拜銀青榮祿大夫。湖廣等處行中書省平章政事。次哈答不花。次阿魯輝帖木兒。皆早卒。次脫烈。太府太監。次哈達帖木兒。大都副留守。次汪家閭。同僉資政院事。女八。長哈達忽都魯。適衛王闊博。次帖木倫。適禮部侍郎不花。次亦老。適集賢大學士兼內史豐國公怯烈該。次伯忽都魯。適大宗正府也。可札魯赤卓思丹朵兒只。次乞刺沈挫。適諸王蠻子。次脫脫倫。適中書邢部侍郎保保。脫脫倫卒。次保僧繼之。次不魯罕忽里。早卒。蓋忠獻九子。惟文忠及今湖廣行省平章政事。薊國太夫人出也。孫男十。女七。文忠之男二。長拔都兒。襲領昔寶赤。次天保奴。女三。長別斤。適中政院判官三閭。次完者提斤。適衛王子吉刺失八。次提斤。玉樞虎兒吐華之男一。紐鄰。女口。達世貼睦邇之男一。瓦咱刺失理。女一。招童。脫烈之男二。長壽安。次某。哈達帖木兒之男二。長萬。次某。女口。汪家閭之男一。博羅帖木兒。曾孫男口。女口。拔都兒之男二。長禿魯。仁虞都總管府達魯花赤。次完者帖木

兒海口屯儲侍衛親軍都指揮使。始忠獻嘗建書院於順寧宣平宮家莊之別墅。賜額景賢。後卽其中爲忠獻文忠兩祠堂。春秋有事於先聖先師。則侑食焉。忠烈忠獻兩王異母兄之子孫。惟榮忠武王之子燕不憐。燕八思提。別不花。伯撒里。爲最顯。燕不憐卒。官遼陽行省平章政事。太保興國公。贈推誠效節佐運。翊亮功臣。太師開府儀同三司。上柱國。追封興寧王。諡忠襄。燕八思提。大司農。別不花。嶺北行省平章政事。伯撒里。由御史大夫累遷江浙行省左丞相。餘皆至大官。莫得而殫紀也。臣潛欽惟太祖皇帝肇基朔漠。世祖皇帝統壹方夏。溥天率土。共惟帝臣。傑出其間。而膺國家之重任者。固非一族。有若康里氏之先老母弱子。不絕如綫。祖宗所以長育成就之。以詒燕于後人者。天實佑之。豈偶然哉。一門三相。豐功茂烈。未易以筆舌擬諸形容。今獨取其關於宗社之安危。民生之休戚者。序次而顯銘之。乃若今大司農之尊君親上。好賢樂善。發其素蘊。紹休前人。珪傳組襲。方興未艾。屢書不一書。是在後之秉史筆者。銘曰。

山川出雲。膚寸之微。縣縣瓜瓞。天實培之。猗康里氏。家有賢母。保其遺孤。克開厥後。有相之道。俾熾而昌。蟬聯奕葉。四相六王。相業之傳。由忠烈始。惟王忠獻。厥績愈偉。披堅執銳。出從撫軍。佩玉瓊琚。入侍嚴宸。塤篪伯仲。股肱左右。奔走後先。獻替可否。陽九之戾。國有危疑。民心靡止。孰爲龜蓍。桓桓忠烈。乃心帝室。明炳幾先。不俟終日。繼以忠獻。載驅載馳。風騰雲躍。夾日以飛。大憝廓清。德音布濩。九廟尊安。三宮悅豫。天子有命。忠獻是膺。乃位談輔。以秉國成。百度惟貞。六服承德。寧有一夫。不被其澤。帝矜南服。爰資保釐。克勤小物。靡有遐遺。秉其忠貞。夷險一節。高朗令終。休有餘烈。積慶儲祉。畀于文忠。世濟其美。乘時奮庸。

袖書金匱。談經氍毹。棄舜其君。貴王賤霸。咨詢故老。延登逸民。量能授任。內外惟均。憐柔遠人。務全國體。威行惠孚。無間遠邇。垂紳正笏。泰山四維。天胡弗憖。當宁興思。大事之書。厥有顯冊。史臣奉詔。表此幽窆。

江浙行中書省平章政事贈太傅安慶武襄王神道碑

至正八年春正月二十日丁巳。詔贈故江浙等處行中書省平章政事也速鐸兒。推忠宣力守正佐理功臣太傅開府儀同三司上柱國。追封安慶王。諡武襄。於是王之薨五十年矣。皇上續承鴻業。追念舊勳。不以存亡久近爲間。渙頒異數。以照臨之。甚盛德也。臣潛承乏詞林。旣推述聖意。形諸贊書。三月丁酉朔。上復用中書奏。勅臣潛考次功業。勒茲樂石。臣被命而退。謹卽王之孫今上都留守古納剌。訪求王世系官。閱行事之實。序而銘之。王元名帖木兒。成宗御極。避而易名。諱曰也速鐸兒。系出兀里養哈鐸氏。其先折里麻生合赤溫。合赤溫生哈班。於王爲曾大父。有子二人。曰忽魯渾。曰速不鐸。俱以驍勇善射稱。忽魯渾則王之太父也。以哈必赤百戶事太祖皇帝。哈班嘗從太祖飲班朮納河之水。遇盜舉槍欲刺之。爲忽魯渾反鋒所刺。人馬俱踣。又嘗從太祖避乃蠻追兵於長城之南。忽魯渾射卻其渠帥。餘衆夜自相驚而潰。中原旣定。方論功行封。不及祿而卒。父曰哈丹。太宗正府也。可札魯忽赤。母曰某。王生於朔漠。資稟雄毅。沈重有謀。讀書能知大意。弱齡入侍世祖皇帝。列職于環衛。以忠議深被眷知。速不鐸之孫。是爲丞相河南武定王阿木。受詔伐宋。王於武定爲從弟。武定察其材智絕人。可爲己貳。言於上。挾與俱行。從武定破樊城。下襄陽。至元十一年。世祖命丞相淮安忠武王伯顏。與武定大會師於襄陽。分軍爲三道並進。忠武

與武定。由中道將濟江。忠武密謀於武定爲擣虛之計。王從武定以昏時泝流行二十里。夜半絕江徑渡。黎明與宋將夏貴大戰。陽羅堡拔之。遂取鄂州。順流而東。宋都督賈似道與大軍相拒於丁家洲。其前鋒孫虎臣來逆戰。武定俾王乘高覘之。見其陣勢首尾橫決。以戰艦衝擊之。似道先遁。十三萬軍一時俱潰。王從武定追奔逐北百五十里。所至禁部曲不得侵暴。敵人委棄資仗。悉以與將士。莫不畏其威。懷其惠。而樂於趨事赴功。十二年。有旨行中書省駐建康。行樞密院駐鎮江。別勅武定攻揚州。武定俾王率蒙古軍慶戰楊子橋。出奇兵斷真州饒道。宋將張世傑以巨舟萬餘艘屯楊子江中流。王從武定領伉健善射者夾射而急擊之。繼以火矢灼其篷檣。大敗世傑于焦山下。自是宋人不復能軍。凡大軍與宋人接戰。王無不在行間。十三年。宋以國降。十四年。朝廷第功行賞。授行中書省斷事官。階懷遠大將軍。十五年。轉昭勇大將軍。十六年。除淮東道宣慰使。遷鎮國上將軍。奉省檄馳報邊事。王謂機事不可不密。入對便殿。出奏牘于懷。上大奇之。召近臣知文墨者使進讀。而左右適無其人。王拜而言曰。臣亦粗知文墨。乃誦其文。而釋以譯語。音吐明暢。辭旨精切。上悅。令縱橫行殿中。而默察之。知爲偉器。諭宰臣俾與共政。遂以參知中書省事。他日奏事殿中。問居何職。王以實對。上詰宰臣曰。朕初意以爲卿同列。置之僚佐何耶。二十二年。丞相魯國忠武王安童自北邊歸。乘以爲世祖言帖木兒蒙古人。而於漢人語言文字無所不通。久淹下位。宜升用之。其言適契於上意。問居其上者爲誰。對曰。參政郭佑。參議禿魯花。拜降。即日命爲中奉大夫。中書參知政事。位郭佑上。仍勅之曰。自今事皆責成於汝。二十三年。進資德大夫。中書左丞。二十四年。

尙書省立拜榮祿大夫平章政事甫視政而宗王乃顏叛扈蹕親征給餉運籌備殫其勤旣平乃顏羣臣從屬車奏凱而歸王復與諸將留兵討其餘黨金家奴塔不斛悉戡定之乃還上以王生事素薄賜鈔五千緡王因奏臣前出軍至亦乞列思之地有來供餽鄉導者上命厚賞之二十七年武平地大震姦人乘災異相煽搖藩王爲其言所動者三人民大惶惑上慮乃顏之黨因而爲變遣王引兵五百人往撫定之王率有司齋沐禱於山川百神以便宜蠲田租弛商稅除酒禁發鈔四萬二千緡運米萬石轉海而至以賑其乏絕教民毋惑於訛言捕斬乘時爲盜者無少貸收三藩王而鞠之始皆倔強不伏旣得其情徐諭以禍福之重輕乃伏其辜事聞上甚韙之遼陽行省治懿州驛道自北京至上都頗迴遠王因奏請徙由高州以北而減去五驛其三以備他驛人戶物力之乏絕其二以隸虎賁司給土田牛具俾之立屯公私咸以爲便方是時桑哥在相位已久專恣日甚誣陷忠良賈官鬻獄設計局以求遺利毒及編民王旣還居政府乃列上其罪狀會侍從近臣亦有顯斥其姦者桑哥及同惡皆誅死王以是益爲上所親信某年拜江浙等處行中書省平章政事仍舊階榮祿大夫成宗皇帝以王先朝舊弼委任愈專江浙省治錢唐實宋之故都所統列郡民物殷盛國家經費之所從出而又外控島夷最爲巨鎮非朝廷重臣莫克任蕃屏之寄王威望素著蒞事伊始風采一新屬部帥守重足而立以俟要束權貴無或敢撓其政豪強震懼田里晏然大德二年秋八月十九日以疾薨於位享年四十有五其年某月某日還葬於大都宛平縣郎山之原王性剛直而善於自持雖異己者莫能伺其間隙由是始卒無疵然喜汲引人物凡所甄拔後多

知名王之配曰忽睹。追封安慶王夫人子男三人曰忽刺姆。江浙等處行中書省平章政事曰探進。御史中丞曰木八刺沙。南陽府達魯花赤女一人曰卯罕。適翰林學士承旨朵姆。孫男九人。脫因納。陝西諸道行御史臺御史大夫。紐兒該。同知都護府事。古納刺。由江浙等處行中書省平章政事。擢江南諸道行御史臺御史中丞。今以榮祿大夫爲上都留守。兼本路都總管府達魯花赤某某。臣潛竊觀自昔君臣際會之盛。或策勳於行陣之間。或訐謨於廟朝之上。未始不各效其所長。若王之出入將相。豐功茂烈。彌久益彰。蓋亦鮮矣。是宜沒而不亡。克承天寵。慶流後裔。與國家相爲無窮者也。垂于竹帛。被于弦歌。光在邦家。豈徒賁其邱隧而已乎。銘曰。

氣運合一。實生偉人。惟材之完。出武入文。聖神御天。誕受方國。猶有江流。限夫南北。赫赫元戎。上所倚毗。乞乞虎臣。左之右之。潛師宵濟。投鞭勇往。訖成僑功。光膺上賞。乃居屏翰。乃登廟廊。身屬囊鞬。取彼叛王。旄頭豹尾。凱旋京闕。分兵後拒。剪其餘孽。將指東藩。假以便宜。力止訛言。俾民不迷。權姦擅國。簧鼓聖聽。朝綱紊弛。民不堪命。白發其私。靡所覆藏。揚于大廷。解弦易張。肅持政柄。坐鎮南服。抱鼓不鳴。家給人足。庶遘其歸。袞衣繡裳。胡不愆遺。奄其淪亡。時逾四紀。綿綿世胄。咸濟其美。賜履之舊。瞻彼郎山。有封斯崇。生氣凜然。拱木清風。念舊旌功。褒美有詔。申勅詞臣。薦此碑號。

朝列大夫僉通政院事贈榮祿大夫河南江北等處行中書省平章政事柱國追封魯國公札刺爾

公神道碑

今上皇帝至正元年。詔贈故朝列大夫。僉通政院事。別里哥帖穆爾。爲資善大夫。河南江北等處行中書省右丞上護軍。追封魯郡公。八年。加贈榮祿大夫。河南江北等處行中書省平章政事。柱國。追封魯國公。嗣子資政院使臣朶爾直班。與大司徒臣雅普化。同侍上於經筵。十年四月十九日。上復用臣雅普化奏。命翰林侍講學士臣潛。銘其神道之碑。別勅治書侍御史臣期頤。篆其額。以賜臣朶爾直班。使書而刻焉。臣潛謹按史臣危素所述公行狀。公諱別里哥帖穆爾。系出札剌爾氏。六世祖諱孔溫窟哇。事太祖皇帝。從征秦疇。蔑里期。奈蠻諸部。奈蠻已降而復叛。往討之。太祖馬憊。遂以己所乘馬奉太祖。步戰而死。贈推忠效節保大佐運功臣。太師開府儀同三司。上柱國。追封魯國王。諡忠宣。妣闊夔。追封魯國王夫人。五世祖諱木華黎。從太祖皇帝滅克烈王可罕。太祖既踐天位。以爲左萬戶。從破金入燕。專征遼東西諸郡。詔授太師國王。都行省承制行事。建牙于燕。以經略中原。趙魏齊魯晉秦之地悉平。贈體仁開國輔世佐命功臣。太師開府儀同三司。上柱國。追封魯國王。諡忠武。妣普合倫。追封魯國王夫人。高祖諱孛魯。嗣國王。奉太祖皇帝命。帥師取西夏銀肅二州。走武仙於河北。降李全於山東。贈純誠開濟保德輔運功臣。太師開府儀同三司。上柱國。追封魯國王。諡忠定。妣奔只海。追封魯國王夫人。曾祖諱速渾察。嗣國王。從太宗皇帝攻鳳翔。破金兵於河南。攻宋棗陽。入鄂州。贈宣忠同德翊運守正功臣。太師開府儀同三司。上柱國。追封魯國王。諡忠烈。妣某氏。禿末忽都。追封魯國王夫人。祖諱乃燕。性謙和而好學。以賢能稱。憲宗皇帝擇忠烈王諸子中可襲爵者。深屬意焉。力辭曰。臣兄忽林池長。上曰。朕固知之。恐其柔弱。不勝重任。爾叩

頭涕泣。卒請以王爵歸其兄。而代之理軍國庶務。忽林池嗣爲國王。事無鉅細。必咨而後行。居常誨羣從子姪曰。昔我先太師國王。躬擐甲冑。出入矢石之間。四十餘年。乃集大功。賞延後裔。恩至渥也。爾曹慎勿驕逸。以隳前人之令名。其敬戒之哉。初。世祖皇帝在潛邸。與之論事。數陳大義。多所開悟。援引典故。尤習上。每以爲可大用。因稱之曰。薛禪。薛禪者。華言大賢也。竟未及用而卒。甚悲悼焉。今贈中奉大夫。遼陽等處行中書省參知政事。護軍。追封魯郡公。妣兀魯氏。鎮台。追封魯郡夫人。考諱碩德。世祖皇帝踐阼之初。自遼西召入宿衛。與語大悅。顧謂近臣曰。碩德通敏如此。乃燕有子矣。命典朝儀。宗藩戚里。爭訟弗決者。必使決之。咸服其公正。上嘗問右丞相魯國忠憲王曰。卿族中可繼卿者爲誰。對曰。性行淳雅。智辨明正。無踰碩德。上深然之。會始建通政院。卽命以嘉議大夫同知院事。考地里之遠近。以立傳置。差民力之高下。以賦財用。一日所奏數事。無不聽納。因言遼陽女真之東。幹拙吉烈滅二族之人。數入寇內地。宜遣親臣設驛以通之。上難其人。僉言碩德元勳世胄。識慮深長。可使也。上恐其憚於行。召問之。對曰。先臣當國家肇造之初。不避鋒刃。萬死一生。以身殉國。陛下不以臣年少愚戇。俾效驅策。臣請行。上喜。賜御宴。對衣以遣之。女真舊土有水達至萬戶府。兵民乏食。廷議賑以衣糧。有司廢格不下。羣訴于公。一日令追所侵匿以給之。人賴以全者甚衆。東征元帥府。道路險阻。崖石錯立。盛夏水活。乃可行舟。冬則以犬駕柅行冰上。地無禾黍。以魚代食。乃爲相山川形勢。除道以通往來。人以爲便。幹拙吉烈滅。僻居海島。不知禮義。而鎮守之者。撫御乖方。因以致寇。乃檄諸萬戶。列壁近地。據其要衝。使諭之曰。朝廷爲汝等遠人。不霑教化。

自作弗靖。故遣使來切責有司。而存恤汝等。令安其生業。苟能改過遷善。則爲聖世之良民。否則盡誅無赦。由是脅從者皆降。遁于島中者。則遣招之。第戮其渠魁。餘無所問。宋之朝士。有以使事留京師。而不肯易其衣冠者。坐徙開元。適與之遇。爲言於上。得自便。後更見識擢爲文學侍從之臣。還朝。上勞之曰。碩德不血一刃。而使一方遂安。不負朕所委任矣。賜玉笠頂連珠束帶。且曰。他日思所以處卿也。扈駕親征。乃顏戰屢捷。所俘獲輒以賜之。宗王居西域者。有異謀。上聞之。召問曰。卿東行甫還。得無勞乎。然非卿執可爲朕使西方者。對曰。臣不佞。幸以勳閭之裔。爲國世臣。邊陲重事。故當任責。賴陛下威靈。東土之民。今已馴化。願備一介之使。宣布德意於西人。上尤喜。賜宴加幣以餞。如東使時。西域知其世家子。又聞其賢。迎勞愈恭。乃諭密旨。爲道太祖聖訓。又前賢之嘉言。詳明激切。發於至誠。咸歎服曰。真天使也。既還。中道屬疾。有旨趣之入見。問以西事。奏對甚悉。上顧左右曰。汝輩苟出使。當以碩德爲法。特賜珠只孫衣以旌之。疾竟不起。今贈推忠宣惠寧遠功臣中奉大夫。遼陽等處行中書省參知政事護軍。追封魯郡公。諡忠敏。加贈資善大夫。嶺北等處行中書省右丞。上護軍。功號封諡如故。先是嘗獲玉璽。其文曰。受命于天。既壽永昌。蓋歷代所寶傳國璽也。疾亟。未及上獻。夫人甕吉刺氏脫脫眞。因御史中丞崔公。或以進于徽仁裕聖皇后。旣而成宗皇帝入繼大統。以爲茲實受命之符。厚賚焉。今追封魯郡夫人。公蚤孤。太夫人教以國書。有微過必責之。輒欣然而改。刻意於學。孜孜不倦。甫成童。太夫人有疾。衣不解帶者旬月。藥必親嘗。成宗遣尙醫視之。或言昔人有割股療親疾者。公聞之。則退詣私室。割肉七瓣。以和藥。疾愈。公丰姿凝粹。而

器量宏達。嘗燕客。家僮滌玉杯。誤墮地而碎。坐客驚視。而公神色自若。衆莫不歎服。逮事仁宗皇帝。眷遇尤渥。擢居通政。俾世父官。上嘗問周文王父母及其所以興。侍臣未有對者。公言之甚詳。上爲之俯聽。賜以扈酒。獎諭之曰。卿蒙古人中儒者也。公於先世所分食邑。平其徭役。而恤其貧乏。在官恆以律身報國。爲務論議可否。不避嫌疑。居五年而終於位。公生於至元二十三年某月某日。薨於延祐四年閏月某日。享年三十有二。訃聞。上當宁而歎曰。天胡奪予良臣之遽也。命賻以鈔萬五千貫。仍降璽書存護其家。公先塋在興和遼陽道遠。弗克以昭穆序葬。遂以其年三月某日。奉柩葬檀州仁豐鄉潮水西吳嘉會。配阿兒刺氏伯篤都彌實。追封魯郡夫人。加封魯國夫人。子男一人。朵爾直班也。公歿時。方在襁褓中。既長。力學自立。由尙衣奉御授工部郎中。遷太府少監。擢監察御史。入奎章閣。歷供奉承制侍書學士。遂爲翰林學士。遷大宗正府也。可札魯忽赤。出爲江北淮東道肅政廉訪使。江南行御史臺治書侍御史。江西行中書省左丞。入爲資正院使。拜中書省參知政事。進右丞。遷御史中丞。改江南行御史臺御史中丞。拜遼陽行中書省平章政事。以太常禮儀院使。召遷中政院使。今爲榮祿大夫。資正院使。提調宣文閣。知經筵事。兼虎符海西遼東道哈思罕等處打捕鷹房。怯憐口萬戶府達魯花赤。提調拱衛司事。女二人。長適遜都氏。實理。由裕宗皇帝位下怯薛。官爲資善大夫同知徽政院事。其先曰赤老溫。與忠武王同事太祖。號四傑者也。次適於彌氏。勃羅帖穆爾。朝散大夫同僉太常禮儀院事。孫男三人。鐵古思帖穆爾。篤堅帖穆爾。渾都普化。臣潛竊觀自昔受命之君。必有不世出之臣。任股肱心膂之寄。以弼成大業。故其子孫能與太

平守文之主。共天下之福。惟扎刺爾氏。有大功於帝室。世享王封。大參始敦行禮讓。而不敢先其兄。右轄辨章之世。其官又止於一命。由其有而不居。故其積也愈厚。餘慶所鍾。在于後人。是故資正公以清忠粹德。昭受上知。致位一品。疏恩三世。茲又賜以碑號。昭示罔極。幽光潛德。闡然日章。久鬱必發。理之常也。臣潛鄙陋荒落。不能敷揚聖意。褒大遺烈。承詔書辭。無任戰栗。銘曰。

天啟興運。篤生元臣。勳在盟府。慶流後昆。於穆魯公。遠有系序。四世五王。逮公大父。遺榮弗居。以奉其兄。不世其爵。世其忠貞。傳子及孫。乃躋臚仕。守夫一官。再世不徙。公少悅學。以至孝稱。淵乎雅度。喜慍不形。材謂則多。小試輒効。人方僕公。謀謨廊廟。嗇不使年。遽以考終。委祉後賢。大亢其宗。寵靈所加。襁以衰職。刻爲密章。告于元宅。有開其先。自王而公。有復其始。履茲故封。申錫頌辭。用垂不朽。河山之誓。相爲永久。

宣徽使太保定國忠亮公神道碑

故榮祿大夫宣徽使答失蠻。以延祐四年九月五日薨於位。享年六十。越三日。葬於京城東社樹辛莊。其明年制贈推誠定力守正功臣太保金紫光祿大夫上柱國。追封定國公。諡忠亮。又六年。史臣禮部尙書曹元用。始奉敕撰次公行業。以爲神道之碑。又二十四年。是爲今天子至正八年夏四月九日。上御興聖殿西便殿。翰林學士承旨臣岳柱。爲請奏。命臣潛繼元用爲之銘。以賜其家。俾刻焉。謹按。公諱答失蠻。其先西域人。系出哈刺魯氏。曾祖馬馬。贈集賢學士正奉大夫護軍。追封中山郡公。祖阿里。贈資德大夫。司農卿上護軍。追封中山郡公。父哈只。贈榮祿大夫。司徒柱國。追封定國公。曾祖妣太帖尼氏。祖妣忽委氏。

並中山郡夫人。妣阿兀思吉氏。定國夫人。初集賢公在西域。爲其國之近臣。素倜儻有大志。知天命之有歸。當太祖皇帝正大位之六年。歲在辛未。奉其國主阿爾思蘭來覲于龍居河。司農公前卒。乃以司徒公爲質子。時年尙幼。上命育於春坊。稍長。事太宗皇帝爲寶兒赤。寶兒赤。蓋古內饗之職。最爲親密。司徒公以恭謹。尤被寵遇。扈從西征有功。妻以河西貴族。定國夫人也。世祖皇帝取南詔伐宋。司徒公皆與行在。尋以疾卒。公少襲父職爲寶兒赤。世祖甚愛重之。嘗侍上左右。極論阿合馬尙書省之政。蠹國病民。上怒而斥之曰。無預若事。公徐對曰。犬馬知報其主。臣世荷國恩。事有關於治亂。安敢坐視而不言。其後阿合馬死。尙書省罷。上乃思其直。賜以玉環及鈔二千五百緡。且諭旨後有所知。其盡言毋諱。從討叛王乃顏有功。妻以名族女脫脫倫氏。仍賜良馬白金佩服珍異之物。杭海之役。督餉餽於雲中。晉王軍乏食。給以米數千石。師還。以專擅待罪。上善其有識量。而知權變。嘉歎不已。賜白金百兩。鈔千五百緡。公因奏草靑畜肥之日尙賒。今所給未充。恐終不免轉死。請增給以半年之食。上從之。衆賴以安。會復立尙書省。公以前有旨得盡言。遂指陳其非便。言尤剴切。暨桑葛伏誅。而其言皆驗。詔賜宅一區。固辭。乃賜玉環及燕服。以旌其忠。禮遇之厚。有加於前。成宗臨御之初。以奉議大夫領供膳司事。叛王海都稱兵內向。車駕親征。倍道兼行。晝夜不息。士卒已疲。而後軍不繼。公諫曰。獨往恐生他虞。宜徐行俟衆大集而後進。乃可爲萬全之策。上聽其言。後數日戰大捷。海都敗走。凱旋而歸。第功行賞。賜以田三百畝。尋擢司農丞。進職爲卿。與其子買奴侍上疾於臥內。連數月衣不解帶。疾少間。賜以鈔二萬五千緡。成宗賓天。公北迓武宗皇帝。

於野馬川。歸正宸極。仁宗在儲闈。以公先朝舊人。奏爲中書參知政事。仍兼司農卿。賜以金帶犀帶七寶笠珠帽珠衣。金五十兩。田二千畝。仁宗踐阼。首命僉宣徽院事。同列以出納不謹。陷於私罪。公獨不汙其事。仍充舊職。歷副使同知院事。遂爲其院使。累階榮祿大夫。嘗侍坐侑食。問以典故。從容奏對。委曲詳盡。深稱上旨。賜三帶海東白鶴。且命國工爲之繪像。其取重如此。俄以疾不能朝。遣尙醫診視。竟不可爲。臨終告其諸子曰。人之隕其世業者。必自貪與奢始。汝等能兢兢自持。不苟取。不妄用。恆以忠君報國尊祖睦族爲念。吾死無憾矣。語畢而逝。公持身介潔。寬厚愛人。輕財樂施。人有忿爭構怨。得一言莫不爲之釋然。咸稱其長者。元配納思馬立氏。婦德母儀。族黨稱焉。生三子。一女。前公二十九年卒。封定國夫人。繼室卽世祖所賜脫脫倫氏。尤篤於慈愛。視三子如己出。亦封定國夫人。子男三人。長買奴。累官河南江北等處行中書省平章政事。今以翰林學士承旨榮祿大夫致仕。次忻都。資善大夫。上都留守。兼本路都總管。府達魯花赤。後公十八年卒。次怯來。資善大夫。同知宣徽院事。孫男六人。亦老答而闌遺。少監哈八失。同知河東都轉運鹽使司事。某某某。曾孫男八人。臣潛奉詔書詞。謹悉取前史臣所述公平生大概備著之。而申之以銘。于以昭示聖天子之追錄舊功。不以久近爲閒。百世之下。何日而忘之哉。銘曰。

惟皇建極。立賢無方。左右侍從。咸懷忠良。猗歟定公。啓家西域。肇自高曾。歸于有德。奉其所事。共惟帝臣。荷天之寵。傳及子孫。逮公而昌。懷材自奮。出從征伐。入陪顧問。密勿告猷。連柱大猷。不以所長。守夫一官。乃位列卿。乃居政路。乃贊國徽。綴班台輔。身後之榮。赫其龍光。惟帝念功。雖遠弗忘。屬辭比事。儒臣之職。

是不一書。爲以新刻。

賈文獻公集

卷之十上

四七一

黃文獻公集卷之十下

碑文

遼陽等處行中書省左丞亦輦眞公神道碑

故遼陽行省左丞亦輦眞。以至正七年冬十月二十有二日薨於位。年五十有二。訃聞。天子爲之嗟悼不已。知樞密院臣老章亦輦眞之弟。適宿衛禁中。上弔慰之。詔有司護送其喪還葬。遂以八年春三月二十有四日葬于眞定樂城先塋之次。而神道之碑。久未有銘。其年冬十月十有二日。上御明仁殿。樞密臣僚人對殿中。知院事阿吉刺臣忽先。臣也先帖木兒等。皆老章之同列。乃代爲奏請。上旣可其奏。遂傳旨翰林。命侍講學士臣潛爲文。學士承旨臣起巖書丹。別勅禮部尙書臣秦不花篆其額。臣潛謹按。公諱亦輦眞。偉吾而人。上世爲其國之君長。國中有兩樹。合而生瘞。剖其瘞得五嬰兒。四兒死。而第五兒獨存。以爲神異。而敬事之。因妻以女。而讓以國。約爲世婚。而秉其國政。其國主卽今高昌王之所自出也。公五世祖之官爲的斤。必里傑忽提。譯言智福大相也。四世祖小云失脫忽憐之官爲吾魯阿烏只。譯言大臣也。父子俱從其國主來歸于我太祖皇帝。小云失脫忽憐。尤見親幸。未嘗輒去左右。從西征有功。令侍睿宗皇帝於藩邸。莊聖皇后子視之。以爲斷事官。眞定。睿宗分地。遂以爲達魯花赤。俾世襲其職。曾祖諱八丹。銀

青榮祿大夫大司徒。祖諱刺真。事世祖皇帝。爲榮祿大夫中書平章政事。考諱察乃。事仁宗皇帝。爲金紫光祿大夫。陝西行御史臺御史大夫。至治中。入爲通政使。用新制。換榮祿大夫。泰定間。終於光祿大夫。中書平章政事。公幼敏慧。不喜與羣兒狎。長者偶見其飲酒。責之曰。是兒少嗜飲。他日可覲其成立乎。公聞之。卽絕飲。而深自飭厲。年逾二十。爲英宗皇帝御位下必閣赤。泰定初。爲內八府宰相。高麗嗣王阿難答失里。旣襲位。其從父弟完者篤懇于上曰。我父兄也。彼父弟也。烏得爲王。阿難答失里來朝。遂留弗遣。而收其印章。至是有旨。命公以阿難答失里復國。公具宣德意。以告其人。闔境之內。無不悅服。初。公弟老章。從明宗皇帝北狩。間關虎口。調護聖躬。親幸無爲比。大駕還自朔漠。公與一二大臣。奉皇帝璽綬。遠迓于傑。堅察罕。上大悅。獎諭之曰。卿祖父克有勳烈。兄弟備殫勤勞。忠孝萃于一門。惟予一人。汝嘉。卽除翰林學士。資善大夫。蒙古教官之選。壅滯已久。俾幕僚閱其牘。而一清之。故事。藩王入朝。從翰林求進止。饋遺交錯。悉拒弗受。遣使諸王。必慎擇其人。未嘗辱命。今天子嗣位之初。擢資政大夫河東山西道肅政廉訪使。召還。除通政院使。奉詔巡視驛傳。公不憚險遠。歷答八失刺哈孫。抵晃火兒目連之地。事有當更革。隨宜處置。人咸便之。大同東勝州之吳欒永興馬牛三驛。牧馬草地。爲諸人所侵冒。訟久弗決。公被旨按問。得其實。十二鄉之人。百有餘家。冒耕其地。已十六七年。一旦同聲辭服。願返所侵地。公爲正其經界。而緩其歷年之租賦。公家三世領通政院事。每以扶殘拯弊爲務。遇災沴。必奏請加恤之。後使者或牽於勢。而

遷山東東西道宣慰使。錢法之不通，鹽法之爲民病者，悉建白而更張之。歲旱有禱，輒應。形於歌謠，事聞有詔獎諭，俾仍舊職。而升其位序于帥座之首。未幾，淮潁羣盜竊發，鄰郡騷然。沂莒滕嶧四州當其衝，民被害尤酷。上命公捕治之。時同僚悉移疾避去，公獨任闔事。使至卽行，不宿命于家。若豫備然。宣靖王尋遣怯薛丹十人與諸郡兵來，從至邳州境內。遇海寧賊兵二百，官軍皆解散。公僅與十二人當其首賊。且擊且射，賊衆披靡，追奔逐北十餘里，斬首七十餘級。其黨皆創殘而潰。公亦以矢盡回沂州。收兵復出，往來逐捕，殺獲不可數計。俄拜遼陽等處行中書省左丞。公曰：代者未至，我安可辭其責。諱知盜在膠州，整兵行至沂水而代者至，乃還。後人賴公區畫素定，故不勞餘力而掃除其遺孽。遼陽久不雨，民間公至曰：是在山東能致雨者，吾屬無憂矣。公視事之日，果應禱而雨。民饑則爲之設法以勸分，薄關市之征以通商旅。米價頓平，人無艱食之患。公才智出於天性，操守得於家傳。遇事立決，嚴不失于苛，寬不失于縱。所至有聲。在遼東三年，鎮之以靜，識者以爲得大臣體。遽以一疾不起，人尤痛傷焉。夫人卜顏，金貴族完顏氏。陝西行中書省右丞教化的之女。累封范陽郡夫人。柔嘉貞順，克盡婦道。見稱於姻族。公兄弟十八，兄曰李季實，中奉大夫河東山西道宣慰使。曰老漢，弟曰老章，光祿大夫知樞密院事。曰草地里，中奉大夫真定路總管府達魯化赤。曰捏烈禿，資善大夫宮傅。曰答刺海，曰羅羅，中奉大夫江東建康道肅政廉訪使。曰撒馬篤，大夫中書參知政事。曰伯顏帖木兒，朝散大夫光祿少卿。李季實、老漢、答刺海、羅羅皆前卒。夫人以公喪至，知院公率諸弟逆於通州，而葬於京城南佛舍。摧慕號泣，哀動路人。其旣葬也，夫人自奠。

定使來告於知院公曰。茲幸獲襄大事。而公歿無遺胤。恐其行能勞烈。久遂湮沒。盍思所以圖其不朽。於是知院公諭于僚友以聞。夫人可謂賢有識矣。龍光下賁。炳耀泉壤。公其庶幾無憾矣乎。銘曰。聖神受命。萬邦來同。羣才雲合。咸在彀中。惟公之先。夙陪禁近。地官之貴。疏榮一品。積慶所鍾。篤生後賢。再世辨章。相業是傳。公方盛年。峻躋內相。升華文苑。爲時雅望。出持使節。風采振揚。昭宣皇度。肅政官常。奉貢修職。布德施令。傳置所達。國之大政。總以專使。患夫才難。夫孰如公。克世其官。來旬來宣。保茲東土。潢池弄兵。公奮厥武。以寡敵衆。莫我敢撓。餘威所加。氛祲廓清。簡在上衷。進位丞弼。殿於大藩。民用寧壹。盍遄其歸。使秉事樞。奄其逝矣。當宁歛歔。公不有子。公多兄弟。承詔勒銘。垂示無止。

資德大夫陝西諸道行御史臺御史中丞董公神道碑

故陝西諸道行御史臺御史中丞董公。既沒且葬二十年。而墓隧之石。未有刻辭。至正十年夏四月九日。皇帝御興聖殿東便殿。治書侍御史臣老老奏請。命翰林侍講學士臣潛爲之銘。資政院使臣朵爾直班書其文。治書侍御史臣期頤篆其額以賜焉。臣潛謹按。公諱士恭。字肅卿。姓董氏。真定之藁城人。贈光祿大夫。大司徒趙國宣懿公諱昉。公會祖考也。龍虎衛上將軍。監軍右副元帥。知中山府事。贈推忠翊運効節功臣。太傅。開府儀同三司。上柱國。趙國忠烈公諱俊。公祖考也。資德大夫。典瑞卿。僉樞密院事。贈體仁保德佐運功臣。太師。開府儀同三司。上柱國。趙國正獻公諱文忠。公考也。妣顧氏。趙國夫人。公生而端重。確實。人未嘗見其嬉笑狎昵。正獻公薨。世祖皇帝甚悼惜之。召見其諸子。公年甫十三。從長兄清獻公士

珍至上前。命往返行於庭中。見其氣宇凝粹。正色斂容。周旋中度。大奇之。自是出入禁闕無間。問曾學射否。對曰。陛下統一四海。功成治定。無事於武。况漢人挾兵有禁。故臣於弓矢之事。未之學也。上顧左右曰。其父祖於國家有大勳勞。非他漢人比。卽賜以弓矢。仍命董氏之族。悉弛其禁。公旣長。入備宿衛。爲尙奉御。從成宗皇帝至三不刺時。方俾道流設黃籙大醮。以公純誠恭謹。命領其事。及代祀嶽瀆。復命稱旨。益被獎眷。忠烈公九子。正獻次居八。世祖恆呼之曰八哥。而不名。正獻五子。公最幼。成宗見公如見正獻。因以察罕八哥呼之。其見親禮如此。大德九年。特授奉議大夫典瑞少監。十一年。有位公下者。中書奏升爲太監。上怒曰。董少監本居上。乃不升何耶。特命升太監。進階正議大夫。公再辭。而後就職。宮車晏駕。親王有覬覦神器者。亟欲得符璽。公橫身堅守。至廢寢食。仁宗入平內難。公奉御寶以進。詢其姓名。以父名對。仁宗大悅。俾司舊職。武宗皇帝旣正大統。賜以黃金帶。以旌其忠。至大元年。典瑞升爲院。卽拜公中奉大夫同知典瑞院事。二年。有勅樹碑先塋。賜以鈔十萬緡。辭至再三。止受其半。訖事。悉分其餘於親鄰。一毫不以他用。四年。出爲江南諸道行御史臺侍御史。處事務舉大綱。不爲苛細。人服其知體。仁宗嗣位。皇慶二年。典瑞爲監如故。圖任舊人。無以易公。乃拜公資德大夫典瑞卿。俾僚幕佩金字圓牌。馳驛敦請。公旣至。適有皇族位公下者。公辭曰。臣以庸陋尸位。惶恐未安。矧敢居宗室之上乎。願處其下。上坐寢殿。遣中使促之曰。朕以卿勳舊之子。故茲委任。其毋多讓。待卿署事。然後視朝。公不得已。乃拜命入謝。上嘉獎曰。老成君子也。嘗問民間所疾苦。以薄斂省刑對。問臣子之道。以忠孝對。由是愈見信任。清獻公薨於開

平特給乘傳。俾公護喪還乘。蓋異數也。延祐二年。復立陝西諸道行御史臺。以公爲侍御史。王曰。董士恭忠勤篤實。宜加升擢。乃以公爲御史中丞。太師阿斯罕。以丞相行省陝西。嘗有旨命之迎接。使服不拜。俄一日詔下。肩輿登堂。北面而坐。衆皆惡其無禮。而畏其勢。無敢以爲言者。公厲聲曰。天子憐公以足疾。賜公便服不拜而已。今坐於堂上。而使衆官具公服羅拜於堂下。不敬孰甚焉。叱左右去其肩輿。明日諸察官踵門謝曰。微公一言。紀綱墜矣。我曹誠可愧。旣而有以尸位自劾者。歲大旱。公齋沐潛禱于九龍池。而雨。歲卽大熟。俄謝病而歸。僚屬追至灞橋遮留之。公不爲止。皆垂泣而還。累擢河北河南江北淮東兩道廉訪使。俱不赴。優游田里。杜門謝客。與世相忘。十五年如一日。雖家事一無所問。嘗語所親曰。吾涉歷官途。東馳西騖。不遑寧處。今幸獲投閑。以詩書教子孫而樂餘年。平生之願也。竟不復出。而以考終。公生於至元十五年三月三日。卒於至順元年三月三日。享年五十有三。以其月十五日。葬於藁城九門先塋之次。娶張氏。中書左丞贈太師忠宣公文謙之女。封某郡夫人。前十年卒。繼喬氏。封某郡夫人。子男二人。長守讓。大中大夫東昌路總管。次守訓。□□大夫中書工部司程。女三人。長適劉文鐸。次適武衛親軍都指揮使鄭某。次適廣東道宣慰使司都元帥府都事蘇樞。孫男二人。錡。鋒。女二人。公質貌魁奇。性度坦夷。慎威儀。寡言語。以謙退自處。而臨事善斷。識見過人。平生不登權貴人之門。上眷雖渥。未老而休。人莫不歎慕之。而公初不自以爲高也。臣潛忝以非才。承乏執筆。隸太史氏。頃歲被旨纂修功臣傳。董氏一門。豐功盛烈。見於登載者。皆幸與聞。茲又承詔嗣爲公碑。考公平生制行。詩所謂好是正直。書所謂世篤忠貞。

易所謂謙謙君子。蓋兼之矣。宜其光膺眷倚。爲國親臣。勳德之著。至於久而人不能忘也。顧鄙陋衰朽。莫能上副聖天子寵嘉老成之意。稽首獻文。無任戰慄。銘曰。

董氏之先。世著勳庸。蟬聯四葉。逮于公躬。公生相閔。蚤有令聞。從容入對。弗亟于進。陟降左右。日侍燕閒。命以典瑞。實惟世官。國有危疑。保其重器。完歸于上。靡容窺伺。人惟求舊。由監而卿。溫其天語。褒以老成。公居外臺。肅持風紀。昭受主知。遂長御史。重臣貴倨。人莫敢言。公顯斥之。朝廷乃尊。奉身而退。時止則止。游頽使節。公不爲起。深居獨樂。十有五年。委順而化。式歸其全。史臣勒銘。勗爾後嗣。敬承天休。世濟其美。御史中丞贈推誠佐治濟美功臣榮祿大夫河南江北等處行中書省平章政事柱國追封冀國公。

諡忠肅董公神道碑

至正八年春。月。制贈故御史中丞董公守簡。推誠佐治濟美功臣榮祿大夫。河南江北等處行中書省平章政事。柱國。追封冀國公。諡忠肅。中書宰臣。旣奉制付外施行。夏四月丙子。復奏請并賜以神道之碑。上可其奏。勅翰林直學士臣潛爲之銘。河南江北行中書省左丞臣守誠。禮部尙書臣期頤。書篆以賜焉。臣潛頓首受命而退。公兄子太常禮儀院判官鑰。以其孤。鎧祥事未畢。代爲奉集賢侍講學士蘇天爵所述行狀授潛曰。請以備采擇。臣潛謹按。董氏世居真定之藁城。公諱守簡。字子敬。曾祖諱俊。龍虎衛上將軍右副元帥。知中山府事。贈推忠翊運効節功臣。太傅。開府儀同三司。上柱國。追封趙國公。諡忠烈。祖諱文忠。資德大夫。典瑞卿。僉書樞密院事。贈體仁保德佐運功臣。太師。開府儀同三司。上柱國。追封趙國公。

諡正獻。考諱士珍。資政大夫。御史中丞。贈純誠肅政功臣。太傅。開府儀同三司。上柱國。追封趙國公。諡清獻。三世並有傳在國史。曾祖妣李氏。祖妣顧氏。妣柴氏。俱從封趙國夫人。公年甫弱冠。入備宿衛。克遵祖父之訓。番直不踰晷刻。步武必中尺度。仁宗皇帝察其忠謹。特命爲集賢侍讀學士。公辭曰。臣幸以家世之舊。給事內廷。臣之學行。猶不及臣兄守中。況國家肇置集賢。資其德義。以輔翼聖明。臣實不足當其選。上曰。朕素知卿家法崇謙讓。今爲卿成之。公兄方官於典瑞。乃特遷之集賢。而授公朝列大夫。僉典瑞院事。以代其兄。官長有善謔者。見公舉止端重。數爲俚語以誚之。上曰。董僉院儒者。勿媿侮也。上嘗賜公以真德秀所著大學衍義。時承平多暇。近侍間進以酒。公因引衍義之說以諫。上嘉納焉。英宗皇帝嗣位。禁衛周密。非元勳貴戚不得入見。獨公出入無間。一日。上問卿平居何好何習。亦善射乎。對曰。臣聞諸父師曰。爲臣當盡忠。爲子當盡孝。竊好其言。患未之能習。弓矢之事。雖嘗習之。非所好也。上悅。有旨馳良馬幣賜之。公奉詔禱祠秦蜀山川而還。上問來何遲。對曰。道經陝西。見民多飢死。移文行省。開倉廩以賑之。故來也。後。然不能無專擅之罪。上曰。卿朕之汲黯也。亟加賞賚。眷遇彌渥。丐外遷嘉議大夫。淮安路總管。爲治務以平易近民。而民自不能欺。土豪或挾其黨與。恣爲暴橫。公痛繩以法。民乃獲安。歲大旱。條列荒政。便宜驛聞。未及俟報。首以祿廩倡僚屬。及富家捐錢出粟。土著之人。則給以錢。使不失其業。旁郡流移而至者。則爲粥以食之。慮衆之所聚。易生疫癘。則處以閑曠高爽之地。死則收瘞焉。旣而朝廷講救荒之政。下令募民入粟補官。公益得盡其心。而不憂於用之不繼。職田皆棄弗取。曰。吾爲天子牧民。寧忍坐視。

其飢而獨飽乎。邗溝水涸。運道弗通。發官帑。僦工疏浚之。因使貧民得食其力。公私咸以爲便。旣而水旱相仍有禱輒應。民以免於捐瘠。未幾。徙汴梁路總管。郡人挽留不得行。單騎由他道而去。汴梁爲大河以南一都會。事至叢劇。公操約馭詳。廷無留訟。齊人官于汴而不返者。有弟利其家貲。迫寡嫂破冢出其柩。歸葬於鄉。嫂弗欲而莫能止也。則匿其夫遺骨之一體。弟訴之官。下嫂於獄。鄰有豪家。覬以賤價得其田宅。乃共賄獄卒。殺其嫂而以病死聞。公探得其情。事乃白。弟及豪家獄卒皆論死。宛邱有惡少。爲宗族閭里害。其同黨乘衆怒殺之。而誘其妻以逃。事覺。有司逮惡少族人。當以殺人之罪。公閱其牘。詰吏曰。惡少旣死。其妻安在。吏不能對。乃捕其黨及所誘妻至。則一訊具服。遂釋其族人。汴人以爲神明。公治兩郡。所至必大興學校以化民。不徒善綜理庶務而已。擢海北海南廉訪使。廣西獠人竊發不時。官軍莫能制。徒侵暴居人。湖湘間尤困於飛芻輓粟。民無寧歲。公劾罷其總兵官。行省左丞。諸軍肅然用命。其地悉平。遷江淮財賦都總管。或疑公有不屑爲。公恪共其職。無少憚。人乃知公未易淺窺也。擢山東廉訪使。以疾告歸。居無何。召爲大都路都總管。兼大興尹。辭不赴。特遣中使賜以上樽。強起之。旣入見。上面諭曰。朕深知卿淮安汴梁之政。京師雖浩穰。以卿之才爲之。無難也。輦轂之下。豪右多挾勢以撓法。有犯者。公一無所貸。威聲大振。聞者無不震懼。期月而政成。除樞密院判官。擢山東廉訪使。未行。拜中奉大夫。陝西行中書省參知政事。以疾辭。擢浙西廉訪使。召除侍御史。拜資善大夫。湖廣行中書省左丞。俄改拜江南行御史臺御史中丞。先是。剏建龍翔集慶寺。雜取土田器物之籍于官者以給之。故平章政事張蔡公別業亦隸

焉。被旨復以歸于張氏。有司猶豫觀望。弗卽奉行。公旣至。立命歸之。召還。拜御史中丞。用人但取其中實。惡以訐爲直。以察爲明。不動聲色。而保完正氣。其識量遠矣。居數月。拜中書左丞。公力辭曰。臣以非才。忝備官使。受任以來。夙夜戰兢。恆恐墮祖父之遺業。而負國家之至恩。况中書出治之本。丞轄列於執政。何敢貪冒寵榮。而不自揆乎。上曰。此朕志素定。卿其勉思報効可也。公旣視事。以幾甸之民阻飢。白于丞相。出京倉粟二十萬石。下其直以濟之。慮四方之遠。耳目有所不及。則遣官分道撫問。而存恤之。時宰執惟公爲漢人。畫禦災之策。至忘寢食。形容爲之枯槁。新進士當授官。而銓曹言恐礙入粟補官者。公曰。朝廷下詔求賢。將以爲公卿大夫之儲。苟急於彼而緩於此。人將以獻策不如獻粟爲口實。而貽笑於天下後世矣。衆無以對。乃授進士官如故事。有司患盜。欲重其法。公曰。民貧故爲盜。不求所以使之不爲盜。而淫刑以逞。豈善政乎。或謂頃歲汴人構亂。首惡固已伏誅。而連坐者獄猶未竟。此盜所以滋也。公曰。罪人已得。州縣奉行文書。容有不能辨其真僞者。非可盡以首從論。且事在赦前。豈可使國家失信於人。而無以安反側乎。當坐者百餘人。皆釋不問。以左丞知經筵事。仍總裁遼金宋三史。及三史成。公自中書奏上之。未幾復拜御史中丞。進階榮祿大夫。公援舊比固辭。上再三勉諭。乃拜受。至正六年夏四月。大駕時巡上京。公扈從至幄殿。上解御服以賜。命居大都留臺。五月庚子。以疾薨于位。享年五十有五。臨終告其子鎧曰。我在中書時。皇上賜以先清獻公神道之碑。而久未及刻。我死。汝亟爲之。言訖而逝。訃聞。上爲之震悼。賻以鈔二萬五千緡。仍令有司護視其歸葬。遂以六月癸酉。葬藁城九門之東高里先塋。公資稟沈毅。履

行淳篤。生將相家。而未始象於貴驕。清獻公家法素嚴。公居侍旁。循循雅飭。早涉書傳。不煩師授。而大意已瞭然心目之間。蓋其所養。與草茅凡下。固自不侔也。忠烈家庭之訓曰。或少遭多難。長遇明時。樹立勳名。皆朝廷聖德神功之所及。今老矣。無能爲也。汝等當思廉慎不欺。以報國家。或以貪墨敗官。則非吾子孫。死亦不得從葬先兆。宜謹識之。公佩服不敢忘。故居官以清白著聞。家無留貲。僅蓄書數萬卷。俸祿不侈於自奉。惟喪祭則致其豐。待宗族羣從以恩。吉凶皆有所給。教子必延名師。里中孤寒之子。亦使就學。接公卿士庶。咸有禮度。故歿之日。無貴賤少長。莫不痛悼焉。公娶烏氏。國朝名士冲之女。於經史無不通。動必協於闡範。累封趙國夫人。子男二人。長鉞。內供奉。見謂能稱其家。不幸前卒。次卽鎧。好學而有立。當用磨補官。未命。女二。長適祕書監丞鄭郊。次適崇福司丞張某。若稽古昔帝王之興。必有豪傑起而應之。率資其力以成大業。至於第功行賞。剖符受封。傳子及孫。保其世祿。重侯累將。未爲乏人。若夫異材間出。繼世象賢。秉忠懷誠。以承休德。書于史策。號曰名臣。求之近世。如董氏一門者。未見其比也。當金之未造。忠烈公灼知天命。擁衆來歸。與金人戰死濰水上。而金亦尋滅。其後正獻公與其伯兄忠獻公文炳。仲兄忠穆公文用。俱以勳。臣子從征雲南。又從伐宋。濟江而還。暨再出師。忠獻遂與丞相淮王伯顏同取宋。而定天下于一。際時承平。忠穆旣以耆德元老。總臺綱。掌帝制。正獻復以上所親信。入尙符寶。由郎而卿。逾二十年。子孫世嗣其職。而公在典瑞。歷兩朝。不遷他官。御史中丞。位望尤爲尊重。自忠穆至公。父子兄弟。居是官者六人。可不謂昭代衣冠盛事乎。江漢之詩曰。無曰予小子。召公是似。肇敏戎公。用錫爾祉。公正

色立朝。始終一節。增光前烈。形於贊書。天子之命公。與宣王之命召虎。殆無以異。公雖死猶生也。臣潛鈞。槩末學。固不敢竊自附於大雅之詩人。欽承詔旨。序次本末。抑亦庶幾無媿辭者矣。銘曰。

世其家者。雖古或希。顯允董氏。有之似之。天造方新。聖作物覩。豪傑之興。克歸真主。篤生後賢。卒其伐功。皇靈所加。四方來同。河山帶礪。勳在盟府。正笏垂紳。以文易武。逮公父子。遺烈是承。翊扶熙運。保其盈成。公滋益恭。委蛇進退。陟降左右。踐馭中外。蒐符龍節。未究所施。乃預樞莞。乃佐宰司。乃長御史。整齊憲度。峻陟崇階。丕昭異數。一鑑之亡。哀動帝宸。附碑曰。嘻。茲予世臣。錫之密章。下賁元宅。申以頌辭。樹此貞石。

翰林侍講學士中奉大夫知制誥同修國史同知經筵事追封豫章郡公文安揭公神道碑

至正七年夏四月辛卯。皇帝時巡上京。秋七月丙戌。御慈仁殿。文學侍從之臣。咸就列以備顧問。當宁憫焉。輿念舊人。以故翰林侍講學士揭傒斯神道之碑未立。俾同知樞密院事臣世傑。班傳詔於學士承旨臣岳柱。命直學士臣潛爲之文。仍勅河南江北等處行中書省左丞臣守誠。禮部尙書臣期頤。書篆以賜焉。臣潛蒙恩。起自休退。懼志慮之凋落。無能發揚聖天子敬故尊賢之意。承命震惕。莫知所爲。然竊自念。忝以詞臣。執筆隸太史氏。不敢控辭。謹按前修撰劉聞所上容臺之狀。及前學士承旨歐陽元所爲幽堂之銘。公諱傒斯。字曼碩。揭之得姓。出於楚司馬氏者。以官。出於漢安道侯揭陽定者。以邑。出於漢陽信侯劉揭者。以名。唐末。有檢校尙書左僕射使持節袁州諸軍事守袁州刺史者曰鎮。始家於袁。與居盱江者曰瓊。居豫章者曰璜。同祖司馬。而言姓氏者。或謂當祖安道侯。汝寧之族。則又別祖陽信。世遠譜軼。莫得

而詳公於種爲□世孫。占籍豫章之豐城。豐城今富州也。自曾祖光朝而下三世俱弗仕。以公貴。故祖惟聰累贈嘉議大夫。禮部尙書。上輕車都尉。追封豫章郡侯。考來成。累贈中奉大夫。江西等處行中書省參知政事。護軍。追封豫章郡公。初朝廷罷羣臣贈典。特賜公號貞文先生。至是又奉旨爲建書院。因所賜號以爲額。祖妣黃氏。何氏。妣黃氏。並追封豫章郡夫人。公生而穎悟。年十二三。讀書已能窺見古人爲學大意。家貧不能負笈遠游。父子自爲師友。刻苦奮厲。窮晝夜不少懈。涵濡既久。經史百氏無不貫通。發爲文辭。咸中矩度。同里年相埒者多敬畏而師事焉。年二十餘。稍出游湘漢間。湖南帥趙文惠公淇素號知人。一見輒驚異曰。他日翰苑名流也。程楚公鉅夫。涿郡盧公摯。前後持湖北使者節。程公奇其才。妻以從妹。仁宗踐阼之初。程公在翰林。公至京師。因館於其門。執賓主之禮甚謹。人不知爲肺腑之親也。盧公尤愛其文。亟表薦之。方是時。東南文章鉅工若鄧文肅公文原。袁文清公桷。蜀郡虞公集。咸萃于輦下。公與臨江范梈。浦城楊載。繼至。以文墨議論與相頡頏。而公名最爲暴著。受知中書李韓公孟。集賢王文定公約。翰林趙文敏公孟頫。元文敏公明善。而全平章岳柱。禮遇尤至。相爲推輓。不遺餘力。延祐元年。由布衣入翰林。爲國史院編修官。李公以政府兼史館。觀公所撰功臣列傳。撫卷歎曰。此方謂之史筆。他人真謄吏牘耳。三年。陞應奉翰林文字。同知制誥。仍兼編修。四年。遷國子助教。用本院奏留居舊職。五年。謁告南歸。泰定元年。以元官召。俄丁內艱。公十年間。三應奉翰林。於翰林朝廷之事。臺閣之儀。靡不閑習。王公每謂與公談治道。大起人意。授之以政。無施不可也。天歷二年。文宗始聚勳戚大臣之子孫于奎章閣而教之。

命學士院擇可爲之師者。得十餘人。而無以易公。乃擢公授經郎。閉在興聖殿西。公蚤作。必徒步先諸侍臣而至。諸貴游來受業者。謀合錢爲賞馬。公微聞之。輒自置一馬。尋復鬻之。示不欲以已爲人累而已。其後去公座下而入侍帷幄者。皆爲國之重臣。公未嘗假以爲聲援。視之泊如也。上時坐閣中。有所咨訪。奏對稱旨。恆以字呼之。而不名。中書薦用儒臣。必問之曰。其才何如。揭曼碩間出公所。上太平政要四十九章。示臺臣曰。此朕授經郎揭曼碩所進。卿等試觀之。其見親重如此。豐城地不產金。官府惑於姦民之言。爲募淘金戶三百家。而以其人總之。散往他郡采金以獻。歲課自四兩累增至四十九兩有奇。其人既死。而三百戶者所存無什一。又貧不能聊生。有司責民之役於官者。代輸其金。民多以是破產。因公所上政要及之。遂蠲其征。人賴以甦。至順元年。預修皇朝經世大典。上覽公所撰憲典。顧謂近臣曰。此非唐律乎。超授藝文監丞。參檢校書籍事。且屢稱公純實。欲器使之。而竟不果用。元統元年。今皇帝入正大統。召對便殿。慰諭良久。命賜以諸王所服表裏各一。躬自辨識。乃以授焉。一日入直奎章閣。上適至。左右奉法書名畫珍玩器物以進。公歷陳其製作之年世。與人之氏名。爲之坐閱。移時。至元元年。遷翰林侍制兼國史院編修官。四年。拜集賢直學士。先是儒學官赴吏部銓。必移集賢考較其所業。院下于國子監。監下于博士。吏文稽滯。動經累月。公請奏更其法。以事付本院屬官。人以爲便。五年。奉旨函香祠北嶽濟瀆南鎮。竣事甫畢。便道西遷。丞相太師秦王令集賢促公亟回。以疾固辭。六年。上親擢公奎章閣供奉學士。聞命即日就道。未至。改翰林直學士。知制誥。同修國史。至正元年。肇開經筵。首以公兼經筵官。二年。陞侍講學。

士知制誥同修國史同知經筵事。公階自授經郎。遷至中順大夫。其爲侍講。階當與品對。而新格超陞。不越二等。獨公不爲例。進四等。轉九階。爲中奉大夫。實異數也。經筵無專官。曰領。曰知。多宰執大臣。微辭奧義。率屬公訂定。然後以進。所言往往寓獻替之誠。務以裨益治道。上嘉其忠懇。數出金織紋段以賜之。三年。以年七十致其事而去。詔遣使追及於瀛南。上表力辭。尋復遣使奉上樽。諭旨還撰明宗皇帝神御殿碑。文成。賜楮幣萬緡。白金五十兩。中宮所賜白金。數亦如之。求去不許。命脫脫右丞相。及諸執政。面諭公毋行。公曰。使揭傒斯有一得之獻。諸公用其言。而天下蒙其利。雖死于此不恨。不然。何益之有。丞相因問方今政治何先。公曰。儲才爲先。養之於位。望未隆之時。而用之於周密庶務之後。則無乏才廢事之患矣。他日集議于朝堂。公抗言當兼行新舊銅錢。以救鈔法之弊。執持政不可。公言之益力。事雖不行。丞相以公不阿。獨心敬之。有詔修遼金宋三史。以平章政事而下。暨公等六人爲總裁官。而以右丞相爲都總裁。丞相問修史以何爲本。公曰。用人爲本。有學問文章而不知史事者不可與。有學問文章知史事而心術不正者不可與。用人之道。又當以心術爲本也。公旣領史事。每與僚屬言。欲求作史之法。須求作史之意。古人作史。善雖小必錄。惡雖小必記。不然。何以示勸戒乎。自是毅然以筆削自任。凡政事之得失。人才之賢否。一切律以是非之公。至於物論之不齊。必力與之辯。求歸於至當而止。四年。遼史成。以進。有旨獎諭。仍俾早成金宋二史。公感激知遇。惟恐無以稱塞。辰入酉出。憊不敢休。會盛夏雨潦。襪被宿館中。得寒疾。返寓舍。甫七日而遽不起。公卿大夫士聞者。無不馳往。哭之盡哀。省院臺部寺監而下。咸致賻有差。時

方有使者。自上京。燕勞史局。以公故。爲改燕日。使者以聞。上爲之嗟悼。以楮幣一萬緡。賜其家。仍給驛券。具官舸。送其喪歸江南。公少處窮約。事親菽粗水具。而能得其歡心。曰。有祿入。服食稍踰於前。輒愀然曰。吾親未嘗享此也。故其平生清儉。至老不渝。與兄弟有無相通。始終無間言。子弟有過。不加顯責。奴僕得罪。亦寬容之。人問之。曰。長上遇下。稍見苛急。後生氣習暴戾。不得不以身教也。公立朝。雖居散地。而恆急於得士。考鄉試者二。考會試者一。爲廷試讀卷官者二。考國子公試者七。所甄拔後多知名。御史建白。用會試終場鄉試次。榜舉人爲教官。廟堂以咨於公。力贊成之。由是士無遺才之憾。公喜汲引後進。而不能俯徇流俗。郡縣有一廉吏。稱之寧過其實。聞吏之貪墨病民。亦不曲爲之揜覆。達官大人。忌有不合。終身不造其門。雖見軋而不悔。間寫其不平於文字間。人或疑泰甚。公曰。言當如是。不必慮也。公爲文。敘事嚴整而精覈。持論一主於理。語簡而潔。詩長於古樂府。選體清婉麗密。而不失乎性情之正。律詩偉然。有盛唐風。善楷書。而尤工於行草。國家大典冊。及元勳茂德。當得銘者。必以命公。人子欲顯其親者。莫不假公文以爲重。仙翁釋子。殊邦絕域。慕公名而得其片言隻字者。皆寶而傳之。暮年求文者衆。寢食爲廢。殊不以爲厭。然亦不苟作。有郡守諷其民奉命爲壽。求紀政績。公頗知其人。斥而去之。未幾。其人果以賄敗。客有爲人謁文。而私其金者。他客發其事。公曰。已受之矣。人尤服公雅量。有文集若干卷。行於世。公薨於至正四年秋七月戊戌。享年七十有一。以六年秋九月甲子。葬富州富城鄉富陂之原。制贈護軍。追封豫章郡公。謚文安。有勳爵而無官階。有司失之也。元配李氏。繼卽程氏。太中大夫。同知湖北道宣慰司事。嚴

卿之女。並追封豫章郡夫人。子男二。長法。李氏出。國學上舍生。今用公廕當補官。未命。次廣陽。生七年矣。女一人。適楊湘。蓋人材之生。必於興運。其以文事與時而奮。恆在乎重熙累洽之餘。惟養之厚。而用之不亟。故其望實彌久而益著。非僥倖於一旦。坐致顯榮者。可同日而語也。公以庶士起遠方。而徊翔於清途三十年。晚乃蔚爲儒宗文師。荐膺眷遇。勤事以死。大明在上。照臨所及。故舊不遺。播之聲詩。垂于無極。不亦生榮死哀矣乎。銘曰。

於穆世皇。遐不作人。豐芑之澤。燕及後昆。在仁廟時。郡獻僕僕。出入左右。經文緯武。公居其間。佩玉長裾。載筆以從。其行徐徐。歷事四朝。乃登延閣。乃司論說。乃掌述作。清問所及。字而不名。公滋益恭。不挾不矜。逮今昌辰。峻躋邇列。翮其遠引。萬夫莫遏。天子有命。式遄公歸。重煩以事。俾職訓辭。明明天子。不自神聖。廣廈細氈。公言是聽。稽古圖治。監觀後王。公能敬承。大啟厥藏。發潛闡幽。驗諸成敗。斟酌典謨。用存勸戒。奇聞異見。參錯偃并。公所折衷。信而有徵。藉夫衆功。訖于絕筆。克成公志。公死不沒。人孰不仕。孰完於公。始卒無疵。而以豐終。敬故尊賢。天子之德。詞臣奉詔。薦于樂石。

嶺北湖南道肅政廉訪使贈中奉大夫江浙等處行中書省參知政事護軍追封南陽郡公諡文肅

鄧公神道碑

至正九年夏四月二十日。知經筵事臣朵爾直班。同知經筵事臣墊僊護都。臣潛等。進講于明仁殿。臣朵爾直班。臣墊僊護都。奏鄧文原。經筵舊臣。歷事累朝。備極榮遇。茲又顯受聖恩。贈封定諡。墓上之石。宜賜

刻文。上既可其奏。命臣潛爲之銘。別勅翰林學士承旨。臣起巖篆其額。臣莖僊護都請就令臣朵爾直班書丹。上復如其請。乃退。而以前史臣范棹之狀授臣潛。臣潛謹按。故嶺北湖南道肅政廉訪使鄧公諱文原。字善之。曾祖從黼。妣楊氏。祖昭祖。累贈嘉議大夫。成都路總管。上輕車都尉。追封南陽郡侯。妣羅氏。南陽郡夫人。考漳。累贈中奉大夫。四川等處行中書省參知政事。護軍。追封南陽郡公。妣孫氏。游氏。並南陽郡夫人。其先由長安徙資中。又徙綿之彰明。杭爲宋行都。南陽郡公避蜀兵來依焉。故今爲杭州人。公六歲入小學。九歲從三山楊先生受春秋。十五以流寓取漕薦。暨科舉事廢。遂一意務爲聖賢之學。行益修。業益茂。開門授徒。戶屢常滿。中州士大夫多慕而與之交。徐文獻公琰。高文簡公克恭。知公尤深。王參政巨濟素刻深。與公語亦嚴憚之。巨濟後以事繫獄。自悔不用公言。初用江浙行中書省辟署杭州儒學正。秩滿。調崇德州儒學教授。用薦者擢應奉翰林文字。將仕郎。同知制誥兼國史院編修官承旨。閻文康公復於寮友少所假借。公獨見推重。凡大撰著必屬焉。由應奉升修撰。成宗卽位。就任轉從仕郎。成宗崩。預纂修實錄。姚文公燧。王文肅公搆。並爲承旨。持見不同。閱公所具稿。互有指擿。公不與辨。第令櫝藏以俟。後數日。二公取視之。皆莫能易一字。以儒林郎出爲江浙等處儒學提舉。教人先學行而後文藝。士習爲之不變。召除國子司業。建白修明殿學政。而樂因循憚改作者。與之論不合。遂移疾去。仁宗卽位。詔以科目取士。江浙行中書省檄公考延祐元年鄉舉。公以朝廷立法之初。多采考亭朱氏貢舉私議。慮遠方之士未悉上意。大書其文揭示之。由是士無復踵異時場屋之弊。尋以翰林待制承直郎兼國史院編修官

召臺臣交章舉之。擢承德郎僉江南浙西道肅政廉訪司事。湖州民有抵夜禁者，被執而遁，追者及之，剗刃其右脅。其兄問殺汝者誰，曰：白帽青衣而長身者也。語畢即死。其兄訴之有司，歸罪於直初更張福兒。坐繫三歲。公閱其牘，曰：白帽青衣，姑勿問。福兒身不滿六尺，未見其長。且福兒用左手傷，何以在右。命覆勘之。真殺人者，張彈壓也。建德戴汝惟被盜，已捕寘獄中。而夜有火，其居者失汝惟所在。公曰：此有以也。責有司推治，得汝惟尸於水濱。及其妻謀殺夫狀，人以爲神。江陰饑，民稱貸於富家不得，則持火往取穀，誤焚其屋。十三人所分穀皆不滿五升。有司悉當以強盜，公謂此非其情也。時瘵死者已半，餘皆杖而遣之。平江僧訴總管府判官理熙納其賂，既誣服，而公適至，探得其情，杖僧釋熙，移僉江東建康道肅政廉訪司事。寧國諸路茶課，初止三千餘錠，累增至十八萬錠，皆鑿空取之民間。民受誣抵法，則轉運司得以失覺察擅加罪。五品以下官州縣長吏，皆重足而立。公至而提舉茶事者適以賄敗，乃爲設法而漸去其弊。且建言宜罷茶司而使郡縣領之。饒州有告欺隱官糧者，事連數百人，累歲不決。公曰：此不難知，以官租爲民田交易，而抄戶時以之定差徭，經理時以之定租稅耳。命據籍爲定，訟遂息。小吏有結爲兄弟，持官府短長者，號五虎，杖而流之。人莫不稱快。有甥盜其舅家財者，以贓滿罪至死。公曰：贓五十錠，盜惟二人，其一人所分止五錠，何也？錄之得其實，所盜十三錠而已。遂以減死論。徽州民僞造楮幣於僧舍，有避兩者適見之。其人懼事洩，因啖以利而止之，使爲烘焙。獄具當死。公曰：僞造當死者，其等有七。烘焙當何坐。宜北行使加等杖罪。事聞於朝，報如公言。徽州民謝蘭家貧，其從子回貸以錢而倍取其息，又利其田。

宅而欲搆害之。家僮死，回使告蘭殺之。公察其寃，釋蘭坐回。天方旱而雨，士子或爲私書，以非考亭之學。公命毀其書曰：吾以息邪說也。江浙行中書省，復移行御史臺。檄公考延祐七年鄉舉，得今翰林侍讀學士秦不花以爲舉首。旣上春官，果爲廷對第一。士論翁服，拜集賢直學士奉訓大夫。以地震應詔，論弭災之道，謂今天下士師非才，惟受成於吏，死囚歲上刑曹，類延緩不報，瘐死者多，宜慎選理官，死囚應決卽決，寃卽釋之。河北流民復業，朝廷雖令計口給緡錢，而有司奉行不至，宜會計海運糧支發之，羨餘隨處置倉，以備凶年而賑之。又申言茶法之害民，乞併罷轉運司，以息人怨。感天和，時論韙之。進奉政大夫，兼國子祭酒，依前集賢直學士。被旨知泰定元年貢舉，及上親策多士于廷，仍俾充讀卷官。有詔開經筵，特命中書平章政事張蔡公珪、翰林學士吳文正公澄及公入侍，其見知遇如此。大駕時巡，公當扈從，苦脾疾，就醫於京師，遂乞謝事南歸。歲餘，召拜翰林侍講學士中奉大夫，知制誥同修國史，未行。擢嶺北湖南道肅政廉訪使，以疾不起。天歷元年五月二十二日，薨於杭州私第之正寢，享年七十。以其年七月十三日葬湖州德清縣千秋鄉百寮山之麓。太常初議以莊康易公名，今天子始用公門人集賢大學士馮公思溫之請，特贈公中奉大夫江浙等處行中書省參知政事護軍，追封南陽郡公，改諡文肅。娶徐氏，封南陽郡夫人。前公一月卒，合葬焉。子男一人，衍。用公廕爲承務郎江浙等處儒學副提舉。後公口年卒，女二人。適石洞書院山長史公埜，司徒府掾史戴孟淳，孫男一人，萊孫，公蚤慧，稍長，能自植立。外家游氏，自清獻公相，相宋理宗，門戶輝赫，公未始挾以自矜。又嘗客於故后族謝氏家，視華靡豪縱事，漠如也。公丰姿

凝粹。氣貌純明。內嚴而外恕。議論若不可犯。至於以文相接。以恩相加。未嘗不使人心悅而誠服。平居善處窮約。奉己常薄。待人常厚。諸生有病。而以橐中金託於公者。曰萬一死。願以歸吾親。其死也。或竊以去。公買金以付其親。而終不言。安南入貢。以黃金丹砂象齒爲私覲之禮。公卻之。其人曰。清白物耳。公曰。爾物雖清白。我受之則污也。所至僦屋以居。四壁蕭然。晚乃捐俸買宅一區。將以佚其老而疾。而矣。公於經史百氏之書。無不究極其根柢。爲文精深典雅。東南遺老凋落。旣盡。文章之柄悉歸焉。及在朝廷。施于訓誥者。溫潤而有體。志於簡冊者。確實而有徵。詩尤簡古而麗逸。凡所著有讀易類編若干卷。內制集若干卷。素履齋藁若干卷。行於世。工於筆札。與趙魏公孟頫齊名。徽仁裕聖皇后。命以泥金書大藏經。公應聘。率門人前集賢侍制班惟志等二十人北上。竣事。二十人皆賞官。而公不預。第隨牒調補教授一州。後乃以文學政事。昭被主知。而至大官。前後從游。無慮數百人。惟御史中丞王公士熙。與馮公思溫。位最顯。其受業上庠。而綴巍科。躋臚仕。有名於時者尤多。不可遽數也。始公較藝鄉闈。臣潛誤辱薦名。及公再主文衡。臣潛遂忝預執筆。茲又獲載筆隸太史氏。欽承明詔。勒文公碑。不敢以菲陋荒疎。伏闕控辭。謹拜手稽首。序而銘之。銘曰。

井絡之靈。實鍾後賢。展也鄧公。受材孔全。公方盛年。盤桓山澤。翔而後集。靡徐靡亟。負其所韜。時而出之。學爲儒宗。政爲吏師。其學斯何。蜚英文苑。鋪張阜猷。裁成帝典。弘敷教道。模範國人。談經擅廈。堯舜吾君。其政斯何。肅將使指。扶善遏惡。以樹風紀。鼓之舞之。士氣以振。輶車所屆。獄無冤民。聖門四科。公兼其二。

學以從改。匪有二致。國之老成。天子所毗。公不爲起。乘化而歸。門生奉詔。薦此樂石。庶無媿辭。過者必式。

御史中丞贈資政大夫中書右丞上護軍追封平陽郡公諡文靖徐公神道碑

公諱毅。字伯弘。姓徐氏。世爲平陽趙城人。家于霍峯鄉石明里。高祖諱澤。曾祖諱閏。皆力本尙義。值金季之亂。晦迹弗耀。入皇朝。始有出而仕者。祖諱玉。由元帥府都提控。歷崞縣提領。岢嵐州長官。終於河東南路提舉常平倉事。御史中丞王公博文銘其墓。累贈嘉議大夫上輕車都尉。追封平陽郡侯。祖妣高氏。平陽郡夫人。考諱德舉。由尙書省掾。出爲平陽路轉運司經歷。終於大原路鹽使司提舉。翰林學士承旨姚公燧銘其墓。累贈中奉大夫護軍。追封平陽郡公。妣盧氏。邢氏。並平陽郡夫人。公。盧夫人出也。幼穎異。卅歲受業於魏國許文正公。磨礪浸灌。日長月益。以清方勁正。爲衆所嚴憚。莫不以遠大期之。弱冠辟□□掾。調同知檀州事。當國者急於賦斂。督責甚峻。郡縣長吏。奉承如恐弗及。公獨不阿其意。惟務布德澤。以甦疲瘵。人稱其有古循吏風。世祖皇帝聞其名。擢監察御史。上言江南新附未久。宜隱恤流亡。以固民心。京師天下根本。宜蠲除地稅。以厚民生。檢覈災傷。宜以時而發倉廩之儲。捐山澤之利。申明酒禁。以修荒政。鰥寡孤獨。宜有養。民所疾苦。宜遣使詢問。方今庶政姑息。中書親細務。而宰相失體。六部僚屬。多非其人。因陳省臺爲治之要。及憲司事宜。監治官吏。當加儆戒。不可因人之誣言。而升降察官。行樞密院。行大司農司。行通政院。及尙書省理算受賞進官者。皆可罷。又以日食地震乞罷諸行省。四川妄啟邊釁。交趾虛勞王師。獻策以邀功生事者。宜勿聽。官軍承襲。皆膏粱子弟。未嘗知兵。當別議立法。增國子之員。重教

官之選。以興學校。治宗廟。以崇祀典。修國史。以存故實。設朝立班。不可全無流品之分。實封陳言。毋使苟爲進身之計。他如選用官吏。減錢糧之費。理婚田之訟。馬禁水利鹽鈔諸法。其弊當救者。前後所奏七十餘疏。其言後多施行。世祖賓天。上封事於太皇太后。皇太后曰。四海不可一日無君。大行皇帝奄棄天下。已五日矣。苟非早定大策。萬一或啟姦覲。變生不測。實可寒心。皇孫撫軍朔漠。先帝旣授以皇太子寶。聖意可知。伏願明諭宗藩大臣。叶謀推戴。遣使奉迎。歸正大統。上以副先帝之遺意。下以慰四海萬民之所屬望。廷議聽之。成宗皇帝旣踐天位。首請早正東朝尊號。以嚴孝養。因言陛下虛心求治。而大臣不肯任事。人主之職。在論一相。今宰相員太多。論議不一。伯顏乃先帝舊臣。留以遺陛下。宜亟相之。爲治不在過求高遠。但當遵守舊制。其要有四。親賢。遠佞。信賞。必罰而已。又伏闕上言。建立儲貳。敦睦宗藩。選任臺諫。教習親軍。勿事西南夷。而專備北邊。赦不可數等十事。所上疏又二十餘。上皆嘉納焉。擢僉陝西漢中道肅政廉訪司事。未上。改吏部員外郎。時選曹事多壅滯。公不懼權勢。凡銓量注擬。必考其資歷。察其才品。人皆悅服。奉詔使甘肅。給軍需。糴買轉輸。規措有法。事集而民不擾。除僉河東山西道肅政廉訪司事。閱所部獄囚。而得其冤狀。所釋五百餘人。時稱明允。召爲徽政院長史。舊例臺察於徽政之事。一無所問。公謂法者天下之公器。宜共遵而行之。臺察者。執法之司。何獨不得與聞徽政之事乎。有與公不相能者。力詆之。公卽謝去。尋除樞密院經歷。贊決事機。申嚴號令。本兵者賴其欣助爲多。遷御史臺都事。改右司郎中。除陝西行臺治書侍御史。並以外艱不赴。服除。召爲左司郎中。夙夜匪懈。彌綸庶政。損益進退。必中

其度。列曹咸取則焉。擢治書侍御史。柄臣欲搆害御史郭章。公力爲之辨。有沮之者。事竟報聞。公以言不行。自引去。召還。授陝西漢中道肅政廉訪使。關右地接羌戎。人多強悍。號稱難治。公柔之以恩。而儆之以威。士俗爲之不變。入爲刑部尙書。上言。自昔有國家者。必定律令。使有司知所遵守。方今承平日久。宜參酌古今。立一代之成法。上可其奏。仍命總其事。方次第就緒。未及上。而改授河北河南道肅政廉訪使。無何。復入爲刑部尙書。擢侍御史。除僉樞密院事。仁宗皇帝在儲闈。素知其有公輔之器。及正位宸極。擢江南行臺侍御史。遷燕南河北道肅政廉訪使。召赴闕。遂參議中書省事。頃之。拜陝西諸道行御史臺御史中丞。力辭而歸。每謂人生未老得閑。乃爲貴。吾年周六甲。歷事四朝。恆以無能補報爲懼。安敢昧止足之戒乎。延祐元年十二月二十六日。以疾薨于里第之正寢。享年六十有一。卜以某年某月某日。葬某鄉某之原。公累階資善大夫。訃聞。上嗟悼不已。詔特贈資政大夫。中書右丞。上護軍。追封平陽郡公。諡文靖。仍命詞臣爲贊書以褒寵之。娶裴氏。封平陽郡夫人。子男一人。宗義。亞中大夫。衡州路總管。女四人。長適常德路總管裴宗文。次適姜某。夫亡。年未三十。卽歸居父母家。今已七十餘。次適朝列大夫曹州尹麻郟。次適敦武校尉□□□。權茶提舉王奇。孫男二人。倣。倣。公遺書有奏議五卷。詩文三卷。翰林學士吳公澄爲之序。惟公以純實之資。克成正學。遭逢聖代。爲時名臣。雖雅志恬退。造次不忘於愛君憂國。光膺茂渥。生榮死哀。不亦宜乎。公歿之歲。某始舉進士。至京師。後三十有五年。公孫倣以墓隧之碑未建。介翰林修撰王宗哲以銘來屬。某雖不及游公之門。而觀其光儀。聆其聲歎。讀公之書。而尙論其世。君臣之際。何其

盛哉。序而銘諸。史臣之職也。曷敢以不敏辭。銘曰。

惟公之先。隱顯以時。再世外官。不大厥施。委其餘祉。伊公之貽。公初筮仕。華問四馳。擢真臺端。用副倚毗。作帝耳目。爲國耆龜。宮車晚出。人心危疑。盡言無避。神器有歸。出將使指。風紀是持。入綴從班。獻納論思。乃躋宥府。乃陪宰司。訐謨遠猷。贊襄萬幾。峻陟文階。執法太微。胡然遠引。莫可羈轡。公身在外。忠愛不衰。庶公復來。赤烏袞衣。遺表上聞。當宁齋咨。一鳳之鳴。六龍以飛。申錫寵褒。厥有制詞。有封若堂。昭以銘詩。

墓碑

格菴先生趙公阡表

格菴先生趙公。宋執政也。公之志業。未及展盡於一時。而淑艾之私。有足惠幸乎百世。讀其書者。知爲吾先生而已。蓋自考亭朱子。合四書而爲之說。其微辭奧旨。散出於門人所紀錄者。莫克互見。公始采集以爲纂疏。今四方學者。旣家有其書。以故弗論。若公之世系出處。固不可俾後之君子無述也。按趙氏之先。薊人。齊國公迥。遷居洛。齊公之子。是爲韓忠獻王。族大以衍。派分而三。居毫者曰光祿卿期。又遷處之縉雲。由光祿三世。至公之曾祖考諱濟。贈太子太保。博平郡公。祖考諱診。贈太子太傅。東萊郡公。考諱雷。以再薦於鄉。特贈開府儀同三司。少傅。衛國公。妣田氏。贈蘄國太夫人。公諱順孫。字和仲。八歲能誦說九經。嘉定十五年。賜童子出身。真文忠公見而奇之。謂少傅曰。大君之門者。必此子也。公不以自矜。益務親師。

取友而求其所未至。朝淬夕礪。幾三十年。乃以春秋試于鄉。于禮部皆第一。淳祐十年。賜進士出身。調太平州學教授。秩滿。差江東常平司幹官。未上。改臨安府學教授。召試除祕書省正字。兼景獻府教授。陞校書郎。添差通判婺州。以內憂去。咸淳改元。入爲祕書郎。兼崇政殿說書。公因進講言。今茲建元伊始。正治亂相承之機。度宗疎聽。諭公曰。卿老儒。議論似富弼蘇軾。公退。有旨擢監察御史。仍兼說書。歷右正言。左司諫。遂爲殿中侍御史。皆兼侍講。進侍御史兼侍讀。公久當言路。凡日食震電水火爲災。必援據經傳。及累朝故實。爲危亡可畏之說。隨事致戒。時帑藏枵乏。而人主不知。宮掖汰侈。而大臣不問。公疏奏者八。面奏者三。謂周官九式均節財用。冢宰實總之。今之大臣未聞過而問也。豈不曰錢穀出入。當如陳平問之主者乎。大臣自處不在周公下。而以陳平爲足法乎。真宗嘗令三司具中外錢穀大數。陳恕以天子富於春秋。若知府庫充實。恐生侈心。竟不進。恕慮先朝知其有。臣慮陛下不知其無也。度宗不以爲忤。令內外諸司條具申省以聞。公又言內廷之帑。不可輕發。恩賞之濫。有所謂特除。特轉。特補。特贈者。不可輕徇。庶僚上殿。過爲悉縮。專求瑣細。以備對揚。當申做之。以格習諛踵陋之風。累疏乞召洪天錫。陳宗禮。陳宜中。還居言職。劾龔日升。昏鄙不宜爲察官。他所薦湯漢。李伯玉。何基。徐宗仁。呂圻。歐陽守道。呂大圭。等數十人。多朝廷宿望。及當世知名士。度宗皆嘉納焉。美人楊氏。進封淑妃。公率同列言。美人父楊纘。上遺表未半月。進封之命已下。獨不念其有葛覃之情。蓼莪之感乎。疏入。遣中使問公以正謝之期。降制之日。何時而可。俄又宣諭欲以百日爲制。公復奏請以朞年爲期。時雖不能悉如公言。猶久之。迺成禮。謝堂以從官。

導旨樞廷。出入宮禁。權傾中外。公奏外戚用事。漢祚中微。長此不已。禍有不可勝言者。歷疏其姦於榻前。以去就爭之。度宗諭解。至再。公執之益堅。卒免堂官。堂之弟。以節鉞朝請。居近市。其家僮日伺於闥闈間。細民以物求售。輒攘取之。公奏其狀。度宗以東朝故。猶豫不報。公抗疏不已。卒罷。扈朝請。仍徙其居。賈似道以太傅平章軍國重事。公力陳其賞田變楮之弊。乞討論之。似道上章自辨。且求謝事。會其姪蕃世守廣德。負勢貪虐。公奏黜之。似道滋不悅。公屢以疾丐去。皆不允。新宮之建。議毀民廬以廣衢路。雖用公疏。令帥漕兩司相度指定奏聞。而帥漕希旨。持兩端之說。公再疏言。力爭堅挽於事將形之初者。耳目官之責。陰消潛格於人不知之中者。有股肱之大臣在。今之師臣相臣。有諫玉清昭應如王旦之密疏乎。似道復上章自辨。且乞骸骨。公亦以疾丐去。除吏部侍郎。兼國子祭酒。兼同修國史實錄院同修撰。仍兼侍讀。公猶不自安。求去益力。遂以顯文閣待制知平江府兼淮浙發運使。四年八月也。先是郡庾亦立。率以夏初徵民租。公謂古者十月納禾稼。今先期半載。民何以堪。僉曰。此例行之三十年。不然。將有乏興之憂。公不聽。首以俸入及例卷所供助糴本。而抑浮費以繼之。糴幾二十萬解。迄免預徵。郡既大治。創學道書院。俾諸生肄業焉。五年。復以吏部侍郎召。尋陞尚書。兼職如故。於是似道方諱言邊事。言援襄者尤惡之。公之入對。首言今所謂危急存亡之秋。毋曰端平失襄。他時可以復襄。今日之事。與端平異。不亟援襄。禍至無日。許翰有言。治世諱危亡之事。而不諱危亡之言。亂世諱危亡之言。而不諱危亡之事。人臣知危亡而不言。則人主處危亡而不知矣。入則無法家拂士。出則無敵國外患者。國恆亡。今敵國外患有古之所

無而法家拂士。無古之所有。臣甚爲國家凜凜也。度宗爲愀然變色。似道笑曰。此書生腐語爾。襄縱不守。何至不可立國。遽以亡言。不亦甚乎。公雖莫能與似道合。而似道以公時望所屬。每倚重焉。六年。由吏部尙書拜端明殿學士。同簽書樞密院事。進簽書院事。兼權參知政事。八年。同知樞密院事。兼參知政事。如故。公自躋政地。數建守備之策。似道自詭知兵。終不以爲意。馬丞相廷鸞辭位去。公獨知省院印。度宗欲遂拜公右揆兼元樞。公聞之嘆曰。不早用吾言。國將亡而吾相。吾其爲張悌矣。比降麻。公適中末疾。乃弗果拜。中使傳旨宣問。趣御醫診視。旁午於道。疾少間。除資政殿大學士。提舉臨安府洞霄宮。仍書御扇出。尙方物以寵其行。公舟次富陽。謂所知曰。吾一疾勝二十四考矣。十年。依舊職知福州。福建安撫使。爲州民代輸夏秋二稅。錢以緡計者四十餘萬。而寬催特放蠲減之數。禮士犒軍之費不與焉。代還之日。其土人爭以詩文誦遺愛。軍民焚香夾道持綵旗擁車。不忍去者數千人。公旣歸。知時事不可爲。憂懣成疾。醫以藥進。公麾使去曰。吾可死矣。以至元十三年四月二十又三日。薨於里第之正寢。壽六十有二。某年某月某日。葬縣南鄉憩雲之原。公階止太中大夫。爵止緡雲郡開國公。食邑二千五百戶。食實封君百戶。配胡氏。贈魏郡夫人。子男三人。長曰鞏。次曰瑾。曰華。惟華以承奉郎直祕閣終。鞏仕皇朝。歷南劍建昌邵武。福信五路總管。積官通議大夫。贈兩浙都轉運鹽使。上輕車都尉。追封天水郡侯。諡懋康。瑾承事郎。南劍路光澤縣尹。女一人。壻曰東平呂汲。孫男八人。長曰桂。承德郎湖州路烏程縣尹。次曰楠。曰機。曰棣。曰權。曰椅。曰某。曰某。女八人。長適懷遠大將軍河南屯田萬戶陳夔。次適葉可大。應大圭。陳璋。胡衡。陳允德。杜

龍幼在室。曾孫男七人。女三人。元孫男五人。公幼孤。謹於事母。而持身以嚴。嗜好殊簡薄。踐躅中外。餘二十年。家無留貲焉。初少傅師事考亭門人滕先生璘。授以尊所聞集。公既脫去場屋。遲次里居。因以得於家庭者。邈求考亭之原委。纂疏所由作也。後雖成書。猶不廢考訂。至易簣乃已。公處館職。秉史筆者。或質所疑。輒口占其本末以授之。其博敏又如此。公奏草可見者二十有九。所著惟四書纂疏行於世。近思錄精義若干卷。孝宗繫年錄若干卷。中興名臣言行錄若干卷。文集若干卷。並藏於家。公位二府。法宜有諡于太常。有傳於國史。而公之歿也。兩宮北上。九袞旬矣。後五十有五年。公之孫機。以墓隧之石。未有刻文。爰以狀授潛。備譔次以俾闕軼。潛於公纂疏之書。童而習之。而我曾大父戶部府君。又與公有同年好。施及後人。不敢以不敏辭。惟公夙受主知。以言事官論是非殿陛。上方嚮用。而輒自引去。晚執事樞。國步已棘。范希文修京城之策。不用於慶歷。李伯紀經制兩河之策。不用於建炎。而公援襄之策。不用於咸淳。天之所棄。孰能興之。是誠有非人力所及者。奉身而退。以全其歸。公之自處。則可無憾矣。銘曰。道之不行。託于空言。顯顯趙公。則既有聞。言路之闕。衆正所聚。山川出雲。膏澤在下。夫豈弗逢。止或尼之。瀆則不告。斂藏善龜。善非爲名。禮進義退。靖共夙夜。罔間外內。有命來覲。宵衣以須。蹇蹇匪躬。終始弗渝。孰尸其功。不自爲政。時遊廟堂。勞以二柄。念彼多壘。載瞻四方。曰其殆而。繫于包桑。執之仇仇。聽之藐藐。獨安其危。而以爲樂。大廈之鶩。孰持孰扶。富字曰噫。其遂相予。天胡嗇之。弗俾卒相。迺以晉陽。爲國保障。允矣明哲。歸潔其身。碩果不食。曰惟斯文。若昔大臣。飾終有禮。諡在泰常。傳在太史。公則不逮。公多遺書。

銘以昭之。過者式諸。

濟南高氏先塋碑

國朝之制官七品以上。咸得賜贈其先。所以廣孝而勸忠也。觀夫世數之異。等級之殊。而其積累之薄厚。可得而徵焉。太定元年冬。濟南高公。以亞中大夫鎮江路總管致仕。品第三。有司援典故以聞。被旨追贈二代。信乎其德厚流光者矣。按高氏世居棣州無棣縣之幸禮村。歿因葬其地。蓋其先出於齊公子高。以名爲氏。譜牒墜逸。系緒莫詳。今所居則猶故齊地也。公之曾祖考曰滄州鹽山縣主簿諱輪。祖考曰滄洲孔目官諱憲。今贈中順大夫。同知某路總管府事。騎都尉。追封渤海郡伯。祖妣李氏。渤海郡君。考曰宣武將軍管軍總管諱璋。今累贈亞中大夫。某路總管。輕車都尉。追封渤海郡侯。妣趙氏。王氏。並渤海郡夫人。由鹽山府君而下。三世俱有仕籍。而志局于位。厥施未光。貽慶垂祉。鍾于後人。公實承之。公名仁。字壽之。少以材推擇爲吏。會天兵南伐。署招討司提控案牘。歷萬戶府知事。辟湖廣行中書省掾。從征安南。討兩江羣蠻有勞。受知丞相順德忠獻王。因攜以入覲。旣而丞相改蒞江浙行中書省。奏以爲檢校官。尋遷左右司都事。時同僚多以酒榷鹽筴之利自汙。簿問其事者。以公厲獨清之操。更見識拔。劾上。擢中書工部主事。俄復入江浙行中書省。爲左右司員外郎。除江西行中書省理問官。治蒙山銀賦之病民者。捕寧都土豪之亡命者。興利去害。精用尤著。廷議公以踐敷滋久。將疇其民庸。授吳江州知州。下車未幾。訟簡役均。田里無事。乃大飭三皇孔子廟。去之日。州人相與立石以紀遺愛。部使者以最聞。授嘉興路總管府治

中時列郡方祠奉帝師。凡庀材用。召匠傭。壹出於民力。公獨諭浮屠氏之籍於白雲宗者。俾任其役。官無一粟之費。民無半餉之勞。而祠事以儲。部使者復以最聞。先是公數捧省檄行旁近郡。以丹陽金壇。故有公田虛額。請悉蠲之。而取他羨田補其入。又以松江東鄉水利久廢。田不宜稻。請去故所賦米。而用土產菽粟代其輸。事皆施行。兩郡之人莫不便之。年甫七十。卽乞謝事。不俟報。而歸吳門別業居焉。至是遂休致之請。應追錫之命。而公之妻楊氏。贈渤海郡夫人。劉氏。封渤海郡夫人。公虔奉制書。永懷明發。展省墓下。祭告如禮。退自惟念。宜有以昭上恩。紀世德。乃俾來徵文爲銘。潛聞古之爲銘者。必斟酌先祖之美。而自著其名焉。所以示後世法也。謹敘次高氏之世家名爵。與公之志行官業。而銘以繫之。銘曰。

顯顯高氏。齊文之昭。代祀則縣。莫守其祧。不有厚德。孰復乎始。蟬聯三葉。躋于臚仕。胡卒不耀。不震以轟。諸厥義方。嗣人之承。展也嗣人。是續是似。服勤中外。時踰四紀。乃濟其美。乃揚其名。罔有失墜。以荷寵靈。煌煌天書。下賁元宅。發其幽潛。昭融烜赫。幸禮之原。歸焉豐碑。琢而銘諸。以代鼎彝。百世之下。視此遺刻。維孝維忠。永胤無極。

周府君碑

秦定元年。嘉興吳君漢傑。以所居官品第七。用著令得請於朝。追贈其顯考府君承事郎温州路同知瑞安州事。仍封其母陳氏。妻陶氏。皆宜人。厥明年。漢傑用舉者。以本官署五品職。於是府君累贈奉訓大夫。江浙等處行中書省理問所相副官。飛騎尉。追封嘉興縣男。陳宜人。陶宜人。並累封嘉興縣君。漢傑祇奉。

命書齋肅以告。已事而退。竊自念言。所以致是者。實先人積累之效。福慶衍溢。資及生存。國之寵靈。非屏焉不肖所克負荷。宜紀世德。以承天休。垂示後嗣。永永無極。爰以四明黃岡之狀來謁文。潛惟府君之里。居世緒年壽卒葬。列於吳興趙公所爲誌。趨操行事。施予惠利。播於永康胡公所爲銘。庸敢掇取其大者。以爲植德儲祉之符。而顯誌之。府君姓吳氏。諱森。字君茂。其先汝南人。後徙居嘉興。祖實。父澤。並宦事宋。爲水軍正將。君少襲武弁。以涇海制置使李公會伯。辟署準備差使。仕而未顯。功伐弗揚。國朝至元間。以征東行中書省右丞相范文虎。薦任管軍千戶。遭時承平。始遂遠引。初。府君旣失所怙。悉推貲產。以歸二兄。鞠其弟妹。逮有家室。推是志也。達之鄉鄰。飢有米粟。寒有纊繒。病有藥餌。死有棺槨。舟梁道路。修除惟時。輟田四百畝。闢書塾。聚閭巷子弟。延師儒以教之。由是人知有學。有司狀其顛末。移部使者。覈實以上中書。用近比署其門曰義士云。其寢疾也。遺命捐種戶逋租。猶三千石。春秋六十有四。以皇慶二年五月癸酉。委順而終。窆于所居西北之麟瑞里。於是歲行旣周矣。府君有子四人。長曰漢英。從仕郎。平江等處財賦提舉。已卒。漢傑其第三子。承事郎。溫台等處海運副千戶。今方以才顯榮於時。地恩所及。未艾也。嗚呼。君子之爲善。非以近名。而名隨之。表立景附。聲振響從。有不期而至者矣。然其蓄也厚。則其奮也不亟。易曰。積善之家。必有餘慶。吳氏其成於積。而出於有餘者乎。銘曰。

皇誼古制。引敷孝治。疏封班秩。咸錫爾類。顯顯府君。匪以子貴。啓慶自躬。曰有吾義。其義斯何。在物爲利。由家而鄉。弗屯其施。單夫寡人。幼童弱稚。室無凍餒。俗有孝弟。爲而不居。嗣人之遺。乃播乃穫。乃引無替。

有命自天。下飾邱隧。赫其龍光。松柏衣被。勗哉嗣人。無敢失墜。便蕃申錫。如川方至。增崇本始。覃及來裔。尙不一書。樹酌祭器。

故民應公碑

公姓應氏。諱普。字德施。錢唐人。年六十有九。以大德八年七月某甲子卒。明年二月乙酉。葬縣西履泰鄉。棲霞嶺北之花塢。其配胡氏。年八十有一。以天歷元年三月某甲子卒。四月丁酉。合葬焉。今國子司業韓公鏞。時以使者行部。爲立石采漢碑式。大書其首曰元故民應公之墓。而未有刻辭。公之子本以書來京師。諗於潛曰。發幽潛以起衰懦。觀人風者之事也。吾子以文字爲職業。幸序而銘諸。按應氏之先汴人。政和進士確。南渡時來錢唐。遂家焉。逮公六世矣。公少失所怙。依外氏習爲舉子業。非其志也。尋棄去而讀孫吳書。能通其意。述將略一篇。慨然欲以奇節偉行非常之功。自奮。聞彭文子余毅夫之爲人。心竊慕之。薄遊江淮間。以策干制置使李公廷芝。李公見其魁梧峻整。談論娓娓而奇之。俾以進武校尉。居幕下。當是時。內則權臣擅事。外則疆圉日蹙。諸將多解體。公知無所效其力。乃辭歸。亡何而德祐失國。李公亦死矣。至元間。凡異時有仕籍者。往往持故所受告身。詣京師乞換授。公獨晦匿不肯自言。峨冠大裙。逍遙城市。中日以教子接賓客爲事。閭巷細人無以自業者。時貸以錢而不責其息。人多德之。胡氏名族女。性端謹。不喜爲容飾。以勤儉佐公理其內。公旣歿。撫其幼孤。至於成人。有子男一人。本也。女四。適周某。錢某。周某。郎某。孫男四。材偉俊華。初楊君載未弱冠。公識其爲佳士。俾本與其學。楊君後以布衣登史館。尋擢進

士第。本猶落魄不偶。故集賢大學士王公約嘗薦之。而本既老。其材今方以鄉貢進士起。君子之澤。或者未艾乎。銘曰。

古稱平世。士無功名。胡有其逢。而不有成。括囊以俟。際于文明。傳子及孫。復用一經。有揭墓門。不爵而榮。繫此刻辭。以鴻其聲。

墓碣

董秉彝墓碣

嗚呼。是惟秉彝之墓。始予識秉彝鄞江上。秉彝方妙年。論議疊疊。庶幾能以古人自任者。由是數與之游。別去僅三歲。而復求秉彝於鄞。則秉彝死矣。嗚呼。悲夫。秉彝名復禮。姓董氏。世爲奉化州人。自曾祖庭堅。祖成口。至其父潤。無仕者。秉彝少嗜書。不以貧輟其學。故衣敗絮。無以禦寒。攤紙被挾冊坐。竟日。人莫見其有不堪之色。嘗從鄉先生魯月卿爲舉子業。試有司不中。遂不復踐場屋。益取經史百氏之言。鉤微摭隱。而求極其根柢。間出以爲歌詩雜文。皆清麗古雅可喜。故翰林侍講學士袁公。甚器重之。其父晚得未疾。老母弱弟姊妹之未有家者。居處服食婚嫁之須。一資於秉彝。而後具。秉彝未嘗少戚戚。以動其父母之意。其父母亦驩然以忘其憂。人以爲難。鄞胡氏父子素善秉彝。爲治舍館。俾子弟師事之。秉彝深自刻苦。與之相摩勵激切。夜參半。隔牆燈火明滅。猶隱隱聞讀書聲。雖憊不自休。因以成疾。度不可起。則歸與

其父母訣。竟以泰定三年九月五日卒於家。年三十有三。未娶。無子。以弟驥子爲之後。父命也。賴胡氏爲買棺。乃克以斂。袁公爲發粟。他朋游及方外交。又相與合錢爲助。始克以其年十一月五日。返葬於某鄉。西圃先墓之次。其友汪君敏德以書來曰。秉彝死且葬。子知秉彝者。宜爲銘。胡氏旣買石以俟矣。嗚呼。悲夫。千里駒不出阜櫪。人知其國馬。而未始見其千里也。故子於秉彝。不敢遽以所可見者爲已足。獨哀其年之嗇志之未究而死及之。序而銘諸。有不得苟讓者矣。嗚呼。悲夫。銘曰。生不予前。死不予後。夫孰尸之。俾其父母不得以爲子。而子不得以爲友也。嗚呼。

陳子中墓碣

子中。涿州陳氏。名中。因以爲字。年三十有六。至順四年六月丙寅。終於杭州之寓舍。卜以某年月日。祔葬於湖州烏程縣菁山下先墓之側。其友哲理野臺筮仕爲丹徒。適以事如杭。買石屬予以銘。嗚呼。予固不可無一言以慰子中於地下。抑豈忍言之哉。初。子中合其同志五六人。從予南屏山中。丹徒亦在焉。欲相率推予爲之師。予謝不可。則皆曰諾。然猶有以父兄之雅故。執子弟禮者。予視子中。則畏友也。子中每篝燈挾冊而坐。恆至四鼓。蚤作殊無憊色。其析理據事。毫髮不苟。間出以爲文。皆情深縝密可喜。而子中莫敢自謂已足。不肯急於求售。向之五六人者。或擢泰常第。或以賢書上春官。子中獨未嘗一踐場屋。去年始走京師。就試於鄉闈。考官得其文。將寘之前列。尋復以其說爲疑。竟棄弗錄。子中退自有司。嶮崎四千里。負笈南還。抵家一月而有母憂。又兩月。俄以暴病。一夕不起。嗚呼。子中而止於斯耶。天者之難必。而殃

慶不以其類。乃若是耶。子中之大父德用。晦跡弗仕。父讓。故任連江縣尹。以奉直大夫杭州路管府判官致仕。蓋其先久占籍于涿。由直公仕江南。遂家焉。母李氏。張氏。妻亦張氏。外家之女也。子男一人。女一人。皆尙幼。異時翰林侍講學士巴西鄧公。嘗爲子中扁所居室。曰庸齋。子中請予爲之銘。予未及爲。而遽銘其冢上之石。嗚呼悲夫。銘曰。

原田兮沃沃。匪重兮斯樛。樹之同兮。或以弗熟。異天之忍予兮。胡彼培而此覆。子無憂兮不復。神之聽之兮。後其式穀。

蔣君墓碣

潛弱冠時及石先生之門。聞先生當宋景定咸淳間。執弟子禮者恆以百數。顧生晚不得廁其列。然竊心慕之。先生沒十有六年。而某爲諸暨州判官。始識蔣君陶朱山中。叩其師友之淵源。則執弟子禮於先生者也。君不以輩行自高。言必稱同門。若嘗與游與居者焉。會有詔賜高年帛。郡檄某奉以從事。某方躋君之門。而君已死。將葬。其子果以狀來謁銘。某不得辭。按狀。君諱明龍。字飛卿。姓蔣氏。由漢兗州刺史詡。二十四世至唐尙書左丞冽。又十七世至宋國子監主簿某。監簿生處州教授穎。教授生國子助教燾。助教之子曰一德。君之高祖也。曾祖諱嗣興。祖諱允恭。父諱亨之。皆不仕。其自宜興徙越之諸暨。迨君九世矣。君先娶姜氏。前三十七年卒。有子一人。果也。後娶楊氏。有女二人。長適胡一中。起進士爲紹興錄事。次適趙深。孫男三人。初。助教君無恙時。有異僧突入其室。示以八字。曰傳燈佛祖捏槃會人。揖而與之語。弗顧。

而去。他日以其言驗之。壽略如瞿曇氏。其歿則雙林唱滅之後一日也。自是君之祖若父得壽同。歿之日又同。君之死也。夢其父曰。燈燈續傳。不自我後。不自我先。寤而謂果曰。吾先世之聞於浮屠氏者。固非所敢知。以今之年明之日。徵之。殆與吾夢協。吾其逝矣。卽索紙筆爲書。與親友訣。翌旦。正襟危坐。奄然而化。泰定四年二月十六日也。享年八十有一。葬以某年某月某日。墓在某鄉某原。銘曰。有生之不齊兮。實命自天。修不可強促兮。短不可苟延。天胡厚君之家兮。賦子之獨專。死之日兮。生之年。一門四世兮。弗後弗先。吾固知命可受兮。不可傳。天者之難必兮。孰測其然。于嗟乎君兮。尙歸夫全。

墓表

石先生墓表

先生石氏諱一鼇。字晉卿。世爲婺之義烏人。至大四年。年八十有二卒。明年十有二月壬申。葬賈山之原。嗚呼。先生宋景定甲子鄉貢進士也。人莫或用爲其稱。而稱之必曰先生者。先生學者之共尊。衆人之同慕也。初。徐文清公倡道丹谿。上及門者。或仕或不仕。皆時聞人。文清之學。蓋親得於考亭。而祕書丞王君世傑。則有得於文清者也。先生少受業于監權。貨務都茶場王君若訥。旣又從祕丞君游。學日以茂。實大而聲遠。負笈而至。執弟子禮者。亡慮數百人。然自祕丞君以來。惟用舉子業相授受。故先生之門。名賢書升學館者相望。其高第或據乙科。最後權貨君之孫龍澤。遂爲咸淳甲戌進士第一人。國朝以材學顯融。

於時者。猶彬彬焉。識與不識。咸以是爲先生之盛。至其端緒之微。蘊奧之邃。世固未必盡知之也。蓋先生晚而覃思於易。著互言總論十卷。其爲說不皆本於徐氏。凡文清之教。曰命。曰性。曰心。曰中。曰誠。曰仁。微辭奧義。或尙有託乎嗚呼。昔者子貢蓋歎孔子之文章。而以性與天道爲不可得聞。竊意今之稱先生者。雖其文章猶莫得而聞也。顧以是瑣瑣者爲其盛耶。吾見其爲先生之累而已。嗚呼。有足哀乎。夫所謂同尊而共慕者。其果出於此乎。彼乎。潛生也。後幸獲執弟子禮。而不及與夫數百人者羣游並進。於先生十卷之書。復未能與有聞焉。間乃掇其棄餘。以充有司之求。向之累先生者。閱四十年而固在也。嗚呼。不又可哀乎。夫使先生之道。卒揜遏而弗揚者。誰與。潛實懼焉。謹次其師友源流。揭表慕道。庶來者之求先生。無以彼易此。而徐氏之傳不終寥寥也。先生之世出行事。具於塚上之銘。壙中之誌。茲不著。至哀無文。至敬不飾。故亦弗復爲之辭。

蛟峯先生阡表

或宋禮部尙書方公。歷事三朝。爲時名臣。宋亡。晦迹弗仕。學者因其自號。稱之曰蛟峯先生。如隱者焉。在世祖時。旁招遺老。以待咨訪。詔御史中丞崔或起公於家。辭疾不赴。以高壽終。今天子稽古圖治。誕命儒臣。刊定前史。以監觀其得失。而有司莫能奉公事狀以聞。竟不爲立傳。書已上。而某與公會孫道壑。適同在史館。因得公言之詳。乃撫其大要。而序次之。以授道壑。俾刻石爲阡表。庸備史之闕文。謹按方氏。睦之淳安人。公會祖汝翼。贈宣教郎。祖謙。贈朝散郎。父鎔。封奉直大夫。母邵氏。贈令人。公初名夢魁。淳祐十

年。理宗臨軒策士。覽公所對。敷陳鯁直。親擢爲進士第一。賜名達辰。故公以君賜爲字。用例補京官。簽平江軍節度判官廳公事。寶祐元年。召爲祕書省正字。升校書郎。引疾去官。除著作佐郎。未命。知寧國府。未上。並以言者罷。開慶元年。召爲著作郎。兼權尙左郎官。居無何。復以言者罷。除知婺州。以外臺奏寢新命。除知嘉興府。未上。改知瑞州。甫及葦。亦皆以言者罷。咸淳元年。召爲司封郎官。兼國史院編修官。實錄院檢討官。兼直舍人院。累遷祕書少監。起居舍人。三年。出爲江南東路提點刑獄公事。徙江南西路計度轉運副使。五年。入權兵部侍郎。同修國史。實錄院同修撰。兼侍讀。七年。知貢舉。竣事。除吏部侍郎。丁內憂。服闋。以侍左侍郎召。辭不赴。自是不復出。德祐元年。除京湖四川宣撫司參謀官。權戶部尙書。改禮部尙書。俱以父疾辭。遂丁外憂。此公所閱之官也。祕閣修撰。公之職也。承事郎轉至中奉大夫。公之階也。某縣開國男。食邑三百戶。公之爵也。鄭丞相清之秉政。御筆以雷變徹樂減膳恤刑獄。而獨無求言一條。中外傳聞。以爲廟堂監謗之術。及兩察官以忤清之去國。公亟扣關上書力言之。且謂所貴乎大臣者。以道事君。不可則止。今君嗣未定。不能贊之。敵國佯遁。無以備之。貨臣聚斂。土木方新。顛而不扶。危而不持。則具臣而已。聞其屢疏丐閒。留之者愈堅。攻之者愈衆。此非所以愛之。時公猶在期集所而未官也。上特優容之。賈丞相似道。制置兩淮。海州喪師。更以捷聞。公上疏言海州之事。三童尺子皆能言之。而闔臣以敗爲勝。陛下曲徇其意。出御筆令學士院降詔獎諭之。豈不知而受其欺耶。抑已知而姑以揜外觀而自欺耶。願陛下急收回御筆。以解萬世之議。而免外國之笑。借曰萬世之議未暇恤。鄰敵笑我。何以立國乎。公之取

怒於似道自此始。理宗在位日久，務總攬權綱，政多從中出。羣儉乘時弄威福之柄。公上疏曰：當大本猶豫之秋，豈無旁睨蜉蝣之撼。甫節之饑饉，難度其心。平勃之屹屹，當儲其後。又曰：天下有貧州縣而無貧太守，有貧國家而無貧邸第。南司貧而北司之應奉不貧，百姓貧而縉黃之窟宅不貧。至於挾小才以濟大貪者，近親有依憑焉。宮中有承受焉。左右有游譽焉。陛下以得之左右者，出自聖斷而用之曰：吾自除吏也。不知有從旁竊威福者矣。又曰：京有尹，畿有漕，所以培護根本，愛養命脈。邇年居是官者，不過爲奄豎輩一大承受耳。無名宣頭，真僞莫詰。非時取索，隱匿莫稽。仇士良謂天子不可令閒暇，若以財貨聲色蠹其心，使無暇更及他事，然後吾輩可以得志。今此曹追逼汲汲，求適吾意者，正士良之策也。帥漕兩司疲於應奉，帑庾亦立萬一畿甸之內，有一旦警急，何所趣辦。何所倚杖乎。願斷自今日，止營繕，省宣索，兩司不急之應辦，悉停之。左右並緣需索之有例者，悉閣之。然後可以救兩司之貧，爲緩急之備也。上頗感悟，而土木之功不爲少輟。公復因論邊事屢及之，有曰：善處急者，不以急亦不以暇。古之謀人國於江左者，莫窘於淮淝，而談笑弈棋。莫迫於新亭，而從容就席。固不以急也。外示談笑，而內有以神其指授之略。陽示從容，而陰有以伐其壁後之謀。所謂暇者，豈真暇哉。又曰：吾有以自謀，而不以鄰國之存亡爲安危，則不依於人。吾有以自備，而不以敵國之緩急爲喜懼，則不制於人。苟以彼之存者爲安，緩者爲喜，萬一鄰敵陽示安枕以給我，而假敵以道，臍可噬乎。又曰：今與敵對境，我無一日謀敵，而敵無一日不謀我。彼所築者金城鐵壁，我所築者土妖血山。彼所築者奪我地爲之，我所築者奪民地爲之。其言切中當時玩

細娛而不圖大患之病。尋上疏極陳備邊之策。曰：以必爭之規模奪浮光，然後可以全兩淮而保長江。以必死之規模守樊襄，然後可以拒光化而全江陵。夫淮之猶可守可耕者，以有一綫之河也。今涉河而築浮光，乃吾戶內。若屯於斯，耕於斯，教訓於斯，日夜出騎以撓我，淮東西俱不可耕矣。雖堅城閉壁，而坐於禁制，不得動矣。爲吾之計，當勉諭淮關，盡力以爭浮光。則兩淮猶可安枕也。萬一樊襄不牢，彼反奪之，則江陵孤注，尙足恃哉。爲吾之計，當擇荆之猛將，責以必死之規模，守樊襄。則北可拒光化，南可全江陵。一則思所以奪其地，二則思所以爭其民。則對壘之勝負決，當在此而不在彼矣。識者謂公此疏，真活國之良劑。朝廷不能用，以至於亡。而公言無不驗。重爲之太息焉。御史洪天錫劾內官盧允升、董宋臣不行而去。公移書宰相，勉以行申屠嘉之事。且抗疏援膏肓二豎爲喻。曰：何陛下愛其國不如愛二豎之甚乎。漢唐之季，建置天子，在奄豎掌握。罪大惡極，朝廷不能誅之。天下必有起而誅之者。漢之宦官，陳蕃竇武爭之不勝。并州之將，操戈而殪之。唐之宦官，宋申錫攻之不勝。河中之帥，移兵而屠之。小人之在君側，操心何所不至。其所以不敢動於內者，蓋有所憚於外。若外不足憚，則無忌憚之心生。而無君之惡勸矣。言尤激烈。上覽之不悅。公遂稱疾求去。丁大全力以臺長用事，欲鉤致諸賢。公見幾而作，謁告徑行。董丞相槐勸公不必遠引。公曰：丞相且自照管。越數月，果爲大所繫而去。吳公潛拜左丞相，公亦召還。會國子博士徐庚金等言：大雖去相位，而六賊尙存。乞誅之以謝天下。上諭潛不當汲引庚金等，議論紛紜。潛於榻前自辨。上爲之斂容。而隙自此開。先是鄂渚危急，上命似道提師江陵。似道奏請下流兵權。潛奏鄂以

上既屬似道。鄂以下宜屬趙葵。上不從。徑以下流併聽似道節制。凡似道密奏。外廷不得預聞。上反以不知邊報爲潛罪。及廷臣奏忠王之立。人心所屬。潛獨不然。姦謀叵測。潛遂罷相。中外惴惴。疑必有後命。公上疏曰。天下之所同好。我獨惡之。天下之所同非。我獨是之。則爲人上者。亦難知矣。大抵上易則下親。上難則下畏。下親則上安。下畏則上孤。窘急而求之。一緩而遣之。號呼而進之。一唯而退之。旁觀沮縮。何以作人任事之氣乎。上問爲誰。公奏臣不敢直指。願陛下曲回天怒。以安中外。上乃首肯。而楊前款密之言。外廷無聞知者。既而似道入相。希指論公者。章連上矣。度宗卽位。公乃還朝。一見甚喜。欲大用之。公乞命朝臣爲知縣。以重其事權。專以均田稅。正版籍。均力役。勸農桑。崇孝悌。訓士卒。除盜賊。爲考課之法。有旨從所奏。後沮不行。此公之忠讜見於立朝者也。信州措置軍糧失宜。召亂。朝廷以江東臬事付公。聞命就道。及境。或來言城中事。勸公偃旗息鼓。而過。公笑不答。卽日單騎入州。決獄。一城肅然。密戒能事者。訪得亂卒姓名。禽其兇。拒逆黨。悉寘於法。事平。有詔褒諭。比公於韓魏公云。公於他獄事。莫不盡其情。故一路無冤民。而盜賊屏息。及將漕江西。有獻議於廟堂。請以銅錢一當十。委公自江西行之。公抗言其不便。而止。講行賑糶。以救民饑。乞蠲和糴。以甦民病。有女妖。以左道惑衆。鄰郡愚民。十百成羣。踵門徼福。公杖而流之。由是遂息。此公之績用見於出使者也。蓋似道柄國。十有六年。公屏居者十年。諫則不行。言則不聽。而施於有政者。又廬廬若是。此有志之士。所以羨其際逢之盛。而惜其設施之未究也。公天稟卓絕。於書無所不讀。而會於理學。以爲歸宿。自爲幕職官。至秉麾持節。所至以教化爲先務。暇日輒從容庠序間。授

學者以求端用力之方。自躬行上起。自人倫日用上起。婺之東陽有好事者。創義學。迎致公爲之師。從游者數百人。閩人林光世。蚤緣宦豎而賜出身。及爲浙東常平使者。首劾公不當俯就義學之招。婺州之命。由是而寢。公遂卽家建塾以私淑其徒。後以從官侍經帷。每事啓沃以格君心。度宗眷遇之甚至。問公講授之所。賜御書扁額曰石峽書院。仍賜手詔褒寵之。江南新附。鄉寇猖獗。官舍民居盡燬。而書院巋然。劫火之餘。葺治旣完。諸生稍稍來集。倡明正道。以致知力行名其堂。以仁義禮智名其齋。時所在士風頽靡。公所以振起而作新之者。成効甚著。此則公自任以師道之重。期於繼往聖而開來學者也。公所著有孝經章句一卷。易外傳圖說五卷。尙書釋傳四卷。中庸大學釋傳三卷。格物入門一卷。行於世。公人物魁岸。聲音如鐘。磊落若青天白日。渾淪醇厚。不見涯涘。觀書至老不廢。視紛華盛麗事。蔑如也。待諸父昆弟子姪。各盡其禮。接物以誠。而無不悅服。不爲察察。而自莫能欺。公卒於至元二十八年正月三日。享年七十有一。以三十三年三月二十九日。葬於縣西之安谿。娶趙氏。封令人。再娶朱氏。子男三人。長梁。太學生。次棟。次杰。入皇朝並以儒起家。棟。月泉書院山長。杰。長洲縣學教諭。然皆恬於進取。不有顯秩。女三人。長適修職郎。無爲軍。無爲縣主簿。徐敏中。次適武學生項雄飛。次適邵元廷。孫男四人。女三人。曾孫男七人。女一人。棟之孫道壑。以至順元年擢進士第。今自翰林國史院編修官。出爲嘉興路總管府推官。階某郎。石峽書院旣領於有司。而設師弟子員。道壑病其庫迫弗稱。乃以公之故居。廣其基址。而新其棟宇。絃誦之聲。不減公在時。先儒有言。道不行百世無善治。道不傳千載無真儒。公之道雖不行於當時。而其學有以

傳於後世。夫何憾乎。潛之曾大父左曹府君。實公榜中進士。託斯文之雅故。於公門四世百年矣。今所述乃學士大夫之公言。非潛之私言也。來者尙有考焉。

盤峯先生墓表

陸之桐廬。有隱君子曰盤峯先生。以至大三年正月八日卒。年六十有七。越七年。乃克葬於縣北人隱阡。先墓之次。延祐三年十一月某日也。去年秋。某以退休之餘。被命復出。爇舟桐廬驛。先生之孫裕來謁曰。吾祖之葬。子之鄉。先生方公鳳。旣爲誌于元堂。而未有以表諸封隧。今三十有三年矣。懼愈久人無得而稱焉。敢惟子也請。昔在宋季。先生之外舅。將作少監朱公杰。與潛之曾大父戶部府君。仕同朝。居同里。先生於潛爲大父行。潛年十六七。卽參陪於杖屨之末。先生占貌野服。高談雄辨。四座盡傾。每語當世事。及前代故實。嚶嚶不倦。然喜汲引後進。有如潛之無所肖似。猶不以凡子見遇。每折行輩以相傾下。興懷疇昔。夢寐不忘。竊願以一言自託於先生不可得。而潛亦老矣。矧以裕重有請乎。先生少力學。工於文辭。嘗攜所業。贊見內翰劉公克莊。大奇之。由是名動州邑。弱冠游太學。登咸淳四年甲科。賜進士及第。調衢州軍事判官。用龍飛恩。階文林郎。居官有廉能聲。大參家公鉉翁。詳刑浙左。雅知先生。所至輒挽以自隨。獄事悉委焉。屬部之民有縱火殺人者。株連坐繫甚衆。歲久不決。先生探得其情。多所平反。他疑獄經先生詳讞。無不服其明允。衢俗好鬪。不相能。則弄兵以相讎。先生被郡檄。徧行村落戒諭之。皆委刀劍爲良民。蜀名卿史公繩祖。僑寓是邦。先生暇日。輒相與研究先儒性理之學。爲士者往往聞其緒言。而有所開悟。

故相留公夢炎。郡人也。愛先生才且賢。欲以女歸之。先生不可。乃已。秩滿。辟御前軍器所幹辦公事。未幾。國破而家亦燬。先生避地萬山中。草棲露宿。若與世隔。久之乃歸。而稍復其故宇。爲終焉之計。程公鉅夫。以侍御史將使指南來求遺逸之士。得先生以應詔。先生固辭。弗能強也。留公入覲。後爲吏部尙書。所薦前進士七人。獨王公龍澤起爲行臺監察御史。而先生甘老於布衣。桐君古隱者。廬於東峯。指桐爲姓。縣以得名。先生居東峯之下。西望漢嚴子陵釣臺。唐方元英白雲原。僅數十里。山峙川流。儀刑如在。先生徘徊其間。慨然以古人之風節自期。與鄉先生袁公易。魏公新之。爲三友。袁魏云亡。先生躋孤子立。如鼎一足。意有不適。咄咄書空而已。家公當運祚之垂絕。以使事如京師。久留河間。先生數致書候安否。旣得歸。年已八十。先生徒步往見之。握手道舊故。輒相對歔歔泣下。前郡守方公回。旣奉版圖上于職方。復以總管兼府尹。終更猶留居久。乃去。前後十有二年。先生不一造其門。後與之邂逅于錢唐。始恨識先生晚。賦詩媿謝焉。先生屬續前二日。猶與親友劇談盡數刻。精神無少憤。亦足見其所養有素矣。孔子曰。般有三仁焉。說者以爲人臣之義。莫易明於死節。莫難明於去國。而屈辱用晦者亦所難辯。宋之亡也。先生不在其位。而未始行乎患難。不降其志。而卒以明哲保身。從容於出處去就之際。而不至於屈辱。其善用晦者歟。蓋人之難能。亦非人之所難辯。是用因其迹以推其心之所存。論次而表顯之。庶百世之下。有觀感而興起者焉。其言之詳。誌所載已具。茲不復贅。先生姓孫氏。諱潼發。字帝錫。一字君文。盤峯其別號也。先世由婺之今華徙桐廬。遂爲陸人。高祖顯。曾祖寶。祖漕。貢進士廉。父承奉郎致仕之才。母孺人方氏。妻

朱氏子男二人。濬。誼。女二人。適施昉。毛元。孫男若干人。女若干人。曾孫男若干人。女若干人。先生所著述。散見於學者之家。子死孫幼。久未克哀。聚彙次以行。惟手編前賢紀詠。桐君事曰。桐君山集者。人多傳之。

翰林侍制柳公墓表

公諱貫。字道傳。姓柳氏。其先由展季仕魯。食采柳下。因以爲姓。子孫居河東者。在唐爲官族。宋南渡初。有自解徙杭者。生子曰森。又自杭徙婺之浦江。家於縣西烏蜀山。歷四世。至公之曾祖諱蘊。俱韜晦弗仕。而寓迹於醫。祖考諱補之。迪功郎。嘉興府崇德縣主簿。考諱金。忠翊郎。高郵軍高郵縣令。入皇朝。以公貴。贈奉訓大夫。淮安路泗州知州。飛騎尉。追封浦江縣男。妣俞氏。追封浦江縣君。公之生也。外大父閣門俞公葵。暨泗州府君。同擢右科進士第。因命之曰贊。義取兩文易兩武。用於今文爲貫。故公自署其名爲貫云。公幼有異質。穎悟過人。嘗侍泗州府君謁神祠。得旁人所遺金珠。可直萬緡。密伺其人復至而還之。泗州府君大驚。知其器量不凡。期以遠到。卽歲遣受經於同郡金先生履祥。卽能究其旨趣。而於微辭奧義。多所發揮。既又執弟子禮於同里方先生鳳梧。吳先生思齊。粵謝先生翺。三先生隱者。以風節行義相高。間出爲古文歌詩。皆憂深思遠。慨慷激烈。卓然絕出於流俗。清標雅韻。人所瞻慕。公左右周旋。日漸月漬。不自知其與之俱化也。杭於宋爲故都。向之宿儒遺老。猶有存者。公徧游其門。無不折行輩與爲忘年交。而與紫陽方先生回。淮陰龔先生開。南陽仇先生遠。句章戴先生表元。隆山牟先生應龍。永康胡先生之純。長孺兄弟。交尤密。往來咨叩。無虛日。凡學問之本末。文獻源流。歷歷如指諸掌。發於論議。言必有徵。不

徒事浮藻以追世好也。諸公亦往往喜爲之延譽。由是名聞於一時。初東平王公侯持使者節按察屬部。大舉學政教官之備員充位者。一切謝遣之。更延致前代賢士大夫之老於文學者補其處。於是泗州府君爲之起而主教於鄉邑。公在侍側。王公一見。輒加器重。亟稱薦之。公年甫弱冠。殊未有仕進意。後十有餘年。始以察舉爲江山縣學教諭。又爲昌國州學正。江山乃川阻山窮處。昌國則邈焉雲海島嶼間。公不鄙夷其人。所至日與爲士者敷陳仁義道德之說。人多化之。用累考赴選集於京師。中書左丞張公思明首令子弟來就學。達官大人得公。又皆奇其才。公例當教授一州。用薦者特授湖廣等處儒學副提舉。未上。改擢國子助教階將仕佐郎。由助教爲博士轉將仕郎。前後在弟子列者千餘人。業成而仕。後多知名。遷徵事郎大常博士。時方承平。稽古禮文之事。次第並舉。遇有所討論。公援據詳洽。權古今之宜而爲之折衷。廷議莫不服其精當。沅州歲貢包茅四十甔。茅輕舟搖。多致覆溺。公請附以他貢物鎮其舟。至今以爲便。勳戚大臣請諡者數十家。文移山積。久格不行。公悉爲考行易名以上。凡三月而畢。臨江守李侯偶爲部使爲所劾。他使者力辯其誣。後終於大官。嘗得諡。其家求於諡議中。毋及臨江事。公曰。著其事而白其非辜。安可沒乎。其子乃歎服。柄國者欲以其祖配食孔子廟。衆莫敢忤。公獨毅然持不可而止。有神降于洛郡。長吏列上儀曹。乞加封爵。公以爲神姦能鼓民。不治將爲亂。宜下所部禁戢之。儀曹符本郡如公言。監察御史馬公祖常薦公才任風憲。章再上皆不報。丐外。以文林郎爲江西等處儒學提舉。視事伊始。吏循舊比以例卷進。歲爲米八十石。公斥去之。後來莫有敢追襲其弊者。龍興郡學久廢。公爲新其棟宇。

聘名儒爲學者師。士風以之復振。道士作廟屋。侵學地。東湖書院田。爲僧所據者三百二十畝。悉奪而歸之。他書院不籍於官者無慮數十。舊設主領一員。司其金穀之出納。公命勿設。而以其事分隸所在學官。豐城尸教席者。不任職。士子因持其短長。交詰互訐。公折以片言。而各當其罪。莫不心服。修漢先賢徐孺子墓。立宋高士蘇雲卿祠。古碑碣所紀有關於名教者。必訪求而重刻之。苟可以扶世導民者。無不爲也。南康倉吏坐株連逮繫百餘人。公被行省及憲府檄讞其獄。鉤擿隱伏。而得其情。所平反甚衆。人尤服其長於政事。秩滿而歸。杜門不出者十有餘年。自號烏蜀山人。扁其齋曰靜儉。室廬僅庇風雨。饘粥時或不給。處之裕如。若將終身焉。今天子更化之初。登用儒雅。而中朝諸老。多已凋落。近臣以公名聞于上。乃以翰林待制承務郎兼國史院編修官起公於家。公幡然出見使者。退謂人曰。吾老矣。忝列職禁林。儻緣次對而獲陳堯舜之道。以裨聖政之萬一。豈非幸歟。會有詔復行貢舉法。留主文衡於鄉闈。竣事乃行。到官僅八閱月。俄以疾卒于寓舍。至正二年十一月九日也。享年七十有三。省臺院監皆來致賻。集賢吳大學士直方。國子吳博士師道。並敦鄉曲之義。共經紀其喪事。靈輅南還。諸公引紼陳奠於都門之外。道路之人。咸爲咨嗟隕涕。夫人盛氏。累封浦江縣君。前公十二年卒。以三年十二月二十三日。合葬于縣西通化鄉荆山之原。子男三人。長卣。次同。次因。孫男三人。秬。穎。穆。秬早夭。穎以父命用公廕入官。未調。女一人。公氣韻沈默。局量堅凝。平居未嘗見其疾言遽色。雖有桀鯨者。亦皆望之而意銷。孝友本乎天性。弟實出後。外家俞氏。遇之恩意彌篤。讀書博覽強記。自經史百氏。至於國家之典章故實。兵刑律歷數術。方技異教。

外書靡所不通。故其文涵肆演迤。春容紆餘。才完而氣充。事詳而詞覈。蔚然成一家言。老不廢詩。視少作尤古硬奇逸。而意味淵永。後學之士爭傳誦之。工篆籀楷法。善鑒定古彝器書畫。而別其真贋。晚益沈潛於理學。以爲歸宿之地焉。所著書有近思錄廣輯三卷。字系二卷。金石竹帛遺文若干卷。烏蜀山房類藁二十卷。公之葬也。御史中丞張公起巖。以居冑監時。夙有同寮之雅故。旣爲之銘納壙中。卣等復奉門人宋濂之狀。屬潛爲之表。揭於冢上。潛與公居同郡。學同志。辱游於公最久。知公爲最深。所以圖公於不朽者。潛之責也。是用弗讓。書而授之。俾刻焉。其辭曰。

柳居河東。爲唐望宗。從宋南遷。再世外宮。公生其季。逮今盛際。以文易武。承考之意。延祐初元。朝多俊賢。公游其間。翱翔後先。于于而來。列于庶位。詩書禮樂。孰非吾事。由中而外。退也委蛇。遺世獨立。一紀于茲。國之老成。日益淪謝。鋒車在門。公不俟駕。有懷欲陳。堯舜吾君。輪當次對。乃以訃聞。乘化而行。公乎奚憾。士林靈傷。失其一鑑。斯文未喪。儀刑具存。表以石章。刻在墓門。

張子長墓表

上卽位之十一年。分命儒臣纂修遼金宋三史。今師相以監修國史領都總裁。旣進。擬收擢遺逸之士。四人以兩院次對之職。俾參筆削。仍奏辟子長爲本府長史。使者奉驛券行四千里。求得子長於金華山中。力辭不拜。四方之士莫不高其風。後五年。申命史臣纂修本朝后妃功臣傳。於是山林特起之招。皆正除入館。俾預討論。子長名在五人之列。以翰林修撰儒林郎同知制誥兼國史院編修官召。復避不就。使指

有嚴。不得已爲之起行。然武林驛卒辭而歸。士益以是高之。子長之才之美。過絕人遠甚。其無媿於前修。可傳於來世者。則不在彼而在此也。子長姓張氏。樞其名。子長其字。幼聰慧爽朗。受教於父屏巖先生。而外家潘氏蓄書數萬卷。金石遺文千餘卷。子長盡取而讀之。過目輒不忘。且能通其大意。年十四五。肆筆成章。頃刻數千言。嘗作小臣策。譏宋高宗忘親事讎。而追爲之定復兩宮之計。以爲當時狃於宴安。莫有知出此者。時前代遺老多尙存。無不降歎。弱齡益自愛重。杜門不妄出。頗易視當世。直欲方駕於古人。同鄙之士。與之交者。可以僂數。暇日寓情卮酒。意氣豁然。視餘子蔑如也。海內賢士及名卿才大夫。至於是邦。皆以得見爲幸。或問以古今沿革政治得失。咸樂告之。宇宙之分合。禮樂之廢興。以至帝號官名歲月。後先皆無所脫誤。每及一人。則其世系閎闊。與才質之良窳。歷歷如指諸掌。論事後當成敗。不旋踵皆驗。初。東萊呂成公倡道於婺。不幸天不假以年。故婺之言性理。悉本於紫陽朱文公。由文公五傳爲白雲許先生。子長少先生二十二歲。先生偶見之。漫叩以漢高帝何以取天下。輒應口而對。出入紀傳。貫穿鉤引。語蟬聯不能休。先生大奇之。閱數日。子長以書上謁。先生答書。勗之以正道。期之以大成。子長請就弟子列。先生不可。始終以朋友待之。自是子長益斂華蓄銳。趨於平實。學日以粹。其能不失乎進退之正者。學力所至也。凡爲文務推明經史。以扶翼教道。不喜作瑯瑑侈靡諛戲。豫放浪無實之言。謂學春秋者。必始於三傳。而其義例互有不同。乃辯析其是非。會通其歸趣。參以儒先之說。裁以至當之論。爲三傳歸一義三十卷。又謂啖氏於春秋卓然有見於千載之下。而陸氏繼之。所纂春秋微旨。以朱墨別三傳之當否。

歲久漫滅。寢失其真。乃重加考訂。爲三傳朱墨本若干卷。言有未周。意有未暢。則出新義以補之。金之鉅儒大寧敬先生。有春秋備忘。久未及行於世。暨入國朝。先生之諸孫□□公儼。以憲節來泚於婺。橐其藁。請子長爲之校讎。乃因近臣以聞而刻焉。謂三國之正閏。固不待辯。自古國必有號。史亦從其實而書之。漢之爲漢。未嘗稱蜀。陳壽欲帝魏。而以晉承其統。遂以蜀易漢。抑此所以伸彼也。壽父獲罪於諸葛武侯。而壽又爲武侯子瞻所薄。故於武侯之駿功偉烈。多略弗著。而武侯再挫司馬懿。亦沒而不及。內以報私憾。外以爲時諱也。譙周。壽之所師。力贊後主納款於魏。賈降覆國。壽不以爲非。反善其策。餘所書往往類是。乃糾其疵謬之害義。正其繁簡之失宜。爲刊定三國志六十五卷。又別撰漢本紀列傳。附以魏吳載記。爲續後漢書七十三卷。三國之臣。有能致節於其君者。舊史或諱不書。或書而失其實。或僅見於異代之史。皆爲更定。而於流事必備載。以詳正統。或一事數說。必參訂使歸于一。是非疑似。抑揚予奪。咸有論著。繫于各篇之後。名曰訓志。經筵檢討危君素。言子長是書。立義精密。可資勸講。朝廷爲下本郡。取而上之。宣文閣藏焉。他所著有林下竊議一卷。曲江張公年譜一卷。謂宋之亡也。將相羣臣。仗節死義者。固已有傳在史氏。卑官下士。吏卒女婦之死者。多史所弗錄。乃詢諸故老。旁采稗官。得若干人。爲宋季逸事若干卷。平昔所作歌詩箴銘贊頌碑記序說誌狀之屬。有敝帚編若干卷。其言閎深浩博。而峻厲潔清。援据精切。而論議純正。尤長於敘事。而扶善遏惡。率能使人有所感發懲創。至於微辭奧義。又有未易以淺窺者。大抵其文主於氣。氣命於志。志立於學。故言無所苟。出處之際。無不克踐其言。江西鄉闈。嘗奉書幣迎致。

子長司其文衡。返其幣而卻其請。蓋場屋之文。非子長之所謂文也。子長之先。占籍臨海。唐乾寧間。避地來徙。遂爲婺之東陽人。宋末。稍有出而仕者。曾祖日新。承節郎。祖友諒。迪功郎。父觀光。屏巖先生也。娶金華潘氏。又自東陽徙家金華。先生少游太學。德祐納土。從三宮北上。用執政薦授婺州路儒學教授。階將仕郎。仍刻印以給之。婺歸皇朝之後。有學自先生始。在官十年。改調紹興路平準行用庫大使。循新例。換將仕佐郎。以母老不赴。遂弗仕家食者垂四十年而卒。子長生於至元二十九年二月二十五日。卒於至正八年八月四日。享年五十有七。娶王氏。旣不克終事子長。故子長無子。爲之後者。長曰燧。李氏甥之子也。次曰燃。族人之子也。以十年十有二月九日。奉子長柩葬於金華縣循理鄉信義里。許先生之歿。以其子元屬於子長。元欲師事之。而子長則以先生之待己者待焉。子長之葬。元旣狀其行實之詳。乞銘於危君。且求潛撫其大者。表於墓隧。先是浙東部使者交薦子長。章九上俱未報。逮論撰之命。適承乏北扉。法當歲□□舉守令一人。因以子長應詔。廷議以子長累徵不應。重於勞。以州縣之事。遂格不行。子長平生大節。非獨爲士者知之。宰執大臣亦知之矣。夫旣有以信於今。不可無以貽於後。元所以汲汲焉爲之圖。其不朽也。後漢所稱樊英。初被詔命。僉以爲必不降志。及後應對。又無奇謀深策。談者以爲失望。豈不以其命最高。故其毀益甚乎。蓋名者衆人之所忌。君之所避也。嗚呼。子長明炳幾先。薰不自焚。膏不自煎。以保其身。以歸夫全。松柏丸丸。清風凜然。自今千年。過者式焉。

